

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

¹⁻² Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaaricuajani. Canaa niaacuara naajiyani, socua canaa niishitiojonura niajaniya, Pueyaso saquiriojosano pueya nia quiniuucua. Niaari maninia quiya Pueyaso niquiara, Jesucristo nia rupuesacari. Niaari seetanujuanaa Pueyaso muerasu, puetunu jiyacajinia pueyatajanaa, canapuete Jesucristoocua tiuujiacacuajani. Jesucristocuajaari nojori Jiyaniijia, pa Jiyaniijiajuhuaj. ³ Pa Que Pueyaso, pa Jiyaniijia Jesucristo cuara cumaquiiria niajaniya, juhuajaniya nia quiniuria.

Paari maninia miishaaquiaani Cristo pa rupuesacari

⁴ Maninia nia quiniuucua, janiyari pueyara-caanu Pueyaso sequequiaani “Paacarasho”. Pueyasocuajaari jiyanoehua maninia miiquiaari niajaniya, nia rupuesacari Jesucristo. ⁵ Nia rupuesacari Jesucristo, Pueyasoori puetunu

cumaquiquiaarijianaa niajaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. ⁶ Maninia nia tojitasacari Cristojiniji pohuatasano, niaari maninia miishaaquiaari taa canaa sequequiaari niajanuyacuajani. ⁷ Naacuajitij, niaari tari masequiaari puetunu Pueyaso niquitionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacarihua. ⁸ Pueyasoori nia cumaquiniutianiya pueyaracaanu, maja quenaaja niaacua casaa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhuajaniya quiniutianiya. ⁹ Pueyasocujaari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuhua. Cuno Neyanuni, nojuacuajaari pa Jiyaniijia Jesucristo.

Pueyaso muerasu juhua tamasaca niquitioquiaari

¹⁰ Cuarta Jesuucua tiunianaana, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasaca nia niquitioonu. Maja tamasaca niajaniya. Maninia nia niishiriojore, maja tamaatia. Nia jiuujiaatioorejuhuaj. ¹¹ Naa nia sequeyanijia cuarta Jesuucua tiunianaana, Cloe niquiohua pohuatanuucua janiya niajanuyajiniji. Nojoriiri cua sequerucuaa niaana juayonuujutaquiaa.

12 Naa pahuatasaarucuaa niajanijajiniijia: puetunu pueyajanaana tama sequequiaajaaja: “Canaari Pablo pueyani”. Tamasacanaari saniniuujia sequequiaacujua: “Canaari Apolo pueyani”. Tamasacanaari sequequiaajaacuhuj: “Canaari Pedro pueyani”. Tamasacanaari sequequiaajuhuj: “Canaari Cristo pueyani”. ¿Naatee pueyanaa? ¿Casaara tamajaaja naa nia raqitiijiquianuni? ¹³ ¿Majateeri nia niishiniu? Paari Jesucristo cuaqueyani. ¿Pa Jiyaniijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari moojiniajuhuj? ¡Maja, cuarta Pueyaso pueyanaa! ¹⁴ Janiyaquiiri namitia nia tiuquinijiyaquiiquiaari moojiniani. Naacujitij, majaari nia naata sequenu niaa cua sesajinia tiuquinijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵ Naacujitij, majaari quenaaja tamonu na naata sequenu janiyari na tiuquiniquiaarini. ¹⁶ Quera niyajetaanijia. Janiyari Estéfanos tiuquinijioquiaarijuhua necohuatajani. Majaruhua socua pueya cua tiuquinijionu quiquiaari.

¹⁷ Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyaroquiaari na rupaa cua pahuatana. Majaari cua maniniushitiniu na rupaa cua pahuatasacari, pueya mariqui shanohua cua pahuatasanoocua tiuuri najuhuaanaari. Cuaara tiuutiuuria cutara Jesucristoocua, na miiniuucua maninia pocuara. Pueyasoori pa jiyanooquiaa

saaja Jesucristo cusonuucua niyacutesanojinia pocuara.

*Cristoori Pueyaso cumaaca jiitaa, Pueyaso ni-
ishitiajajuhuaaj*

¹⁸ Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacuaja na tojitianaara, Pueyaso muerasura na jataniniuria pajaniya. ¹⁹ Pueyaso sequesano cuajaari naa naajiotasaaquiaritij:

“Janiyari niishijiaca niishishano cushitionu-taniyani. Mijiria pueya niishishano jiyatenutaniya najuhuanarantijia”.

Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

²⁰ ¿Pueyanoteeri jiyanoohua niishitiajaraca Pueyaso muerasura na jataniniuria pajaniya? ¡Maja! Niishijajanaa jaara jiyanoohua niishiriojore, ¿pa naatate na sequesanoocua tiuuniu, Pueyaso na jiyanootiniuria pajaniya? Maja. ¿Niishitiojona rootasanote na naata Pueyaso pueyara jiyatenu pajaniya nocua pa tiuushacari? Maja. Naacuajitij, puetunu mijiria niishishanojuanaari najuhuaana quiya Pueyasora.

²¹ Pueyari maja na naata Pueyaso niishiniu quiquiaari tama nojori niishitiajatajaaja. Pueyasoori tama sequequiaaritiaaja na niishitiajata cutara:

“Jaaja. Maninia naatej. Pueya jiyanooriiria saaja nojori tiuushacari cua Niyanuucua”.

Pueyari saniniuujia jiyaniya Jesucristo rupaari nareja sequesanojuhuanajaj, tojishoo. ²²⁻²³ Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niquiniu paniquiaa coteenu saaja. Cunora, nojoriiri canaa tojitiaaquiquiaa canaa pahuatasacari Jesucristo mosaanujiniji niyacutesanojinia teetesano. Nojoriiri saaja sequequiaa: “¿Pa Jiyaniijiaranotucua casaara naa cararaatia mosaareni?” Griego pueyari naajuhuaaj. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatiajaca. Nojoriiri jiyaniya Jesucristoori najuhuana cusoquiaari juhua moseeca. Naacuajitij, canaa pahuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaaju quiquiaari. Nojoriiri jiyaniyajuhuaaj Pueyaso Jiyaroso-coriquianoori ritia Judiocuaca jiyaniijiaara quiniutianiya cutara. Majaari na niishitiuniu quijia Cristo cuara coteenu miishaaria naquiya, jiyanooshano nojori quiniuria sesa nojori miijiosanojiniji. Griego pueyari canaa pahuatasano tojiyaquiquiaajuhuaaj. Nojoriiri jiyaniya Pueyasoori niishiyashijia quiquiaari Neyanu na motenura. ²⁴ Paa cutaraari niishiyani Cristoori pocuara cusoquiaari. Naacuajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohuanio. ¡Pueyasoori jiyanohua niishijia cutara! ²⁵ Pueyari jiyaniya Pueyasoori

niishiyashijia quiquiaari. Cunora Neyanu cusojaquiaari niyacutesanojiniaari. Naajaa, naacujiti Pueyasoori pa jiyanooquiaari. Pueyasoori jiyanohua socua niishijia cutara mijiria niishijiacajiniji. Pueyari jiyaniyajuhuj, Pueyasoori cumueecaaju quiquiaari Cristo cusosacari niyacutesanojinia. Naajaa, naacujitij, ¡Cristoori Sesaaca shocotaquiaaricujaja! Pueyasoori jiyanohua socua cumueeca pajaniyajiniji.

²⁶ Cuarta Jesuucua tiuuniaanaa, niaacujajari niishiya taamueca pueya nia quiquiaari pueya niquiarani, Pueyaso sequesacari niajaniya na muerasu nia quiniuria. Saaja secaja niajaniyajinijinioori niishijiaa quiriquiaa. Saaja secaja niajaniyajinijinioori tojishano pueya quiriquiaajuhuj. Saaja secaja niajaniyajinijinioori jiyaniijianucua niquiohuacuajinio supueno quiriquiaa.

²⁷ Mijiria quiniaa pueyara, Pueyasoori socua niishiyashijiaa pueya saquiriojoquiaari, na muerasu nojori quiniuria. Naacujitij, mijiria niishijiaaari tamajaaja caririquiniutianiya nojori jaara saquiriojiyaquishaare. Pueyasoori tojishoo pueya saquiriojoquiaarijuhuj, na muerasu nojori quiniuria, mijiria tojishano pueya caririquiniuria nojori jaara saquiriojiyaquishaare. ²⁸ Pueyasoori soosano pueya saquiriojoquiaarijuhuj, tojishoo pueyano. Pueyasoori naa saquiriojoquiaari najuhuana quijiaca. Canapuate tama na cuaqueyajaaja jiyaniya cutara pueyanoni, cuno pojoriiri saniniuujia quejoosaanutaniya.

29 Naacuajitij, majaari quenaaja jiyanohua pocuaja cureenu quiniutianiya Pueyaso niquiara. Tojetaarucujanaa shaaquiiri pocuajaca quiniutianiya. 30 Pueyasojuanaacuajaari nia rupetequiaari Jesucristo. Naacuajitij, niaari Pueyaso niishitiaja jiitiaa. Nia rupuesacari Jesucristo, niaari maninia miijia quiya Pueyasora. Pueyasoori nia jataniya saa na tojjiiacaraja nia quiniuria, juhua Neyanu nia quiniuriajuhuaj. Niajanitari puetunu jeecasaanutaniyajanaa. Paari naa miishiyani Jesucristo pa rupuesacari. 31 Seetanujuanaari nio sequesano tariucuaaanu Pueyaso Rupaajiniji:

“Cante shuquiriaatia quiniu paniyani, nojuaja cuaara shuquiritiaara pa Jiyaniijia”.

2

Jesucristo mosaanujiniji pohuatasano

1 Cuarta Jesuucua tiunuaa pueyanaa, janiya jaara niaacua tiuquiquiaarini, niaacuajaari niishiya taa cua pohuataquiaari Pueyasojiniji Jesucristo rupaa niajanitari. Majaari jiyajeneta cua pohuatanu quiquiaari niishijaca niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janitari jacaria pohuataquiaari Pueyaso rupaa niajanitari.

2 Janitari tari tama sequequiaarijiaanijia: “Janitari saaja Jesucristojiniji pohuatanu paniya Corinto pueya niquiarani, naajuhuj, taa na cusoquiaari pocuara niyacutesanojiniani”. 3 Cua pohuatasacari Jesucristo rupaa nia niquiara,

janiyari sasaca quiriquiaa cua puerenutani. Janiyari tetecariquiaani. ⁴ Majaari cua paniniu quiquiaari cua tiutiniuria nijaniya Jesucristoocua tama cua niishitiajataaja. Naaratej, majaari cua pahuatasano quiniu quiquiaari juhua shanohua pahuataja sequesano. Naacuajitij, cua pahuatasacari Jesucristo rupaa nia niqiara, Pueyaso Sohuanu cutaraari nioojacajinia poonijioquiaari Pueyaso cumaacata cutara. ⁵ Naacuajitij, niaari Jesucristoocua tiuquiaari Pueyaso cumaaca miishacari maninia nioojajinia. Maja cutaraari nia tiuuniu quiquiaari saaja pueya niishishanoocua.

Pueyaso Sohuanucuaajari pa niishitiya Pueyaso

⁶ Naajaa, canapuate Pueyasoocua tiujia seetanujuanaa cutarani, nojoriiri niishiya canaa pahuatasano Jesucristojiniijiiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiaaari shaajeconutaniya. Nojori niishishanoori najuhuana quiniutianiya. ⁷ Canaa pahuatasano cutaraari Pueyaso niishishano tarijia, jiya shipinishaacarijiyojua. Pueyasoori jiyacari niishiriojoquiaari jiyanohua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. ⁸ Mijiria jiyaniijianucuaari nio niishiyaquiquiaari. Nojori jaara na

niishiquiaari tarijia, nojori maara pa Jiyaniijia moyaquiquiaari niyacutesanojinia. ¡Na Shipininia motuquiaarijiaari, pueyaracaanu shacantuuca quijia!⁹ Naa naajiotasano quiyacuajaari tariucuacaanu Pueyaso Rupaajinia:

“Pueyasoori jiyasohuaja casaa jeenucuasano jiiitaa na panijiaca pueyara. Cunoori maja pueya niquishano quenaaja. Majaari cunojiniji nojori tojishano quenaajajuhuj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pahuataani.¹⁰ Pueyasocujaari quiarijia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojiajinia niishiya.¹¹ ¿Cante pueyano niishiriojosano noojiajinia niishiyani? ¿Majate saa na camaru sohuanujua niishiniu? Taaquiririnij. Naajuhuj, saaja Pueyaso Sohuanuuri Pueyaso niishiriojosano noojiajinia niishiya.¹² Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jiiitanu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhuj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitiosano pajaniyarajanaa niishiniu. ¡Jiyanohua capora Pueyaso!¹³ Naacuajitij, canaa pahuatasanoori

maja saaja mijiria pueya niishishano. Pueyaso Sohuanujuanaari canaa niishitiojoquiaari Pueyaso rupaa canaa niishiniuria canaa jiuujiajania. Naacuajitij, canaa naata Pueyaso Sohuanu jiidanaa niishitiojonu seetanu Pueyaso rupaaajanaa, mariyata taa Pueyaso Sohuanu niishitiojoquiaa canaacuaani.

¹⁴ Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵ Cante Pueyaso Sohuanu jiidanaa, nojuajaari na naata puetunu niishishanojuanaa saniniujiunuu. Saniniuujia, tamasa pueyari maja na naata Pueyaso Sohuanu jiidana miishano niishiniu nocuara na rimiaaquenura. ¹⁶ Tariucuacaanu Pueyaso Rupaaajinia naa naajiotasaaquiaarijiuhuj:

“¿Cante pa Jiyanijia jiuujiajania na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

3

Pueyasora poonijionaa pueya cuara poonijionuuriquia nojori panitioonuta

¹ Cuarta Jesuucua tiuuniaanaa, cua quishacari naata, majaari cua naata jiyajeneta Pueyaso niishishano cua niishitiojonu quiquiaari niajaniya. Niaari quera juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojjiaca seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijiaca pueya nia quishacarijia.

² Cua niishitiojosano niajaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari niajaniya. Cuno niishishanoori cumueeca Pueyaso pueyara, naatej, taa shu quiya tariucua puereetuuca pueyaracuaani. Juhua naatujoori nia quishacarijia, majaari nia naata na tojiniu quiquiaari. Juhuanujuajaari maja nia naata na tojiniu quiarijiani. ³ Niaari juhua Pueyaso Sohuanuuju quiyajaa, juhua Pueyaso niishiyashijiaca pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaca pueya. ⁴ Niaana sequequiaa: “Canaari Pablo pueyani”. Tamasacanaari sequequiaajuhaaj: “Canaari Apolo pueyani”. Naacuajitij, puetunu niajaniyajanaari saaja juhua Pueyaso niishiyashijiaca pueya quiyajaa.

⁵ Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa

nia tojitianura. Canaari Jesucristo panishano miiquiaarini taa na sequequiaari canaa miiniuriacuajani. ⁶ Naacuajitij, janiyari Pueyaso rupaa nia pahuataquiaarini, naatej, taa casaa jajau pueyano natoojoquiaacuaani. Apoloori saniniuujia socua Pueyaso rupaa nia niishitiojoquiaari na cumaquiniuria niajaniya, naatej, taa pueyano na natau shiijioya mohuacatacuaani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. ⁷ Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojitiniu na rupaa, seetanujuanaa na muerasu pa quiniuria. ⁸ Naacuajitij, paari niishiyani, cante natoojonani, cante mohuaca shiijiotanani, canaari mariyata saaja Pueyaso poonitijosanoni. Pueyasocuajaari canaa niqutionutaniya na jiiiasano, nera canaa poonijionuucua. Cante socua poonijioreeni, Pueyasoori socua na jiiiasanojiniji na niqutionutaniya taajecori pueyajiniji. ⁹ Canaari mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijiuria, maja tia matanura. ¹⁰ Pueyaso jaara jiyaroquiaari janiya, janiyari Jesucristo rupaa pahuatanu coteequiaari maninia niajaniyani, Pueyaso muerasu nia quiniuria nia tiuushacari cua pahuatasanuocua.

Naacaujitiij, janiyari juhua Pueyaso tiara shipinini coteequiaarini. Cua niishitiojosano niajaniani, cunoori juhua morijiu nujuatejosano quiquiaari. Cua nuhuaji, tamasaari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuaara niishiiria maninia, maninia nojori niishitiojonura niajaniani, juhua maninia tiasano nia quiniuria.

¹¹ Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacuajaari na rupaa pohuataquiaari niajaniani. Saa na rupaacua nia tiuushacari, niocua maninia quiri, juhua maninia morijiu cuacua tiasano tia, maja na matanura. ¹²⁻¹³ Cante socua Jesucristo rupaa niishitiojiya niajaniani, cuno cuaara niishitiojoora jyanohua maninia. Cuaara niyajetaaquiiria cutara, nojuajaari na niishitiojosanojiniji nequesoreesaanutaniya Jesucristo muetasacariuhua pocua, pa miishano na saniniuuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota, platatanio, shanohua saitanio, maniiri maja na naata na catijianu. Cante saniniuujia tiaree macacatani, tucurutajuhuj, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia? ¹⁴ Tamonu jaara maninia miijia

quiquiaari Pueyaso cumaacata, na miishanoori maja najuhwana quiniutianiya Pueyasora. Pueyasoori cuno pueyano niqutionutaniya na jiiiasanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. ¹⁵ Cante saniniuujia tiaquiaari cateja casaatani, na tiasanoori catenutaniya. Puetunu na jiiiasanojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuunaa, canapuate maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

¹⁶ ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojiacajinia quijia. ¹⁷ Tamonu jaara Pueyaso quiquio sesore, Pueyasoori cuno pueyano saniitionutaniya saniniuujia. Puetunu Pueyaso muerasujuanaari juhua na tia quiya. Pueyaso quiquio cuara quiiria tojetaarucujanaa maninia, saa neraja, maja raquiriojotasano. Niaacuajaari na quiquio.

¹⁸ Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijiaca niquiara. Cuno pueyano cuara jataara cuno na niishishano juhua niishiyashijia na quiniuria narta pueya niquiara. Na nuhuaji, cuara maseera Pueyaso niishitiaja, seetanu niishijia na quiniurijanaa.

19 Mijiria pueya niishishanoori juhua paateca sequesano Pueyasora. Tariucuacaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquiitianiniutianiya, tama nojori niishitiushanoocuaajaaja nojori tiuushacari najuhuanaj”.

20 Naa naajiotasanoori quiyajuhuaaj:

“Pueyasocuaajaari mijiria niishijiaca niishiriojosano niishiya. Naa sequeyari: ‘Najuhua-naari cuno pojori niishiriojonuusano’ ”.

21 Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasaca pueya jiyaramiquiquiaa nia cumaquiniuriajuhuaj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanoocuaaja nia jiaatianu. ²² Pueyasoori canaa jiyaramiquiquiaari canaa cumaquiniuria najaniya. Naacuaajitij, janiya, Apolo, Pedro, canaari niaara quiyani, maninia canaa miiniuria najaniya Pueyaso rupaata. Nio jiyari niaara quiyajuhuaaj. Pueyaso shipinishanocuaajaari niaara. Naajuhuaaj, mijiria nia quishacari, cunoori niaara quiya, socua maninia quijiara nia quiniuhuara. Taa nia miishiya quiarijiacuajani, taa nia miishaanutaniyani, puetunu cunojuanaari niaara, cumueeca Pueyaso muerasu nia quiniuria. Nia shaajesacariiri maninia quiniutianiya niaarajuhuaaj. Pueyasoori nia shaajeteya na shuriucua nia quianura. Naacuaajitij, puetunu casaajanaari niaara

quiya. ²³ Niajaniyari Cristora quiya saniniuujia. Cristoori saniniuujia Pueyasora quiyacujua.

4

Jesucristo jiyaramiquishano poonijosano

¹ Naaratej pueyanaa, niajaniya cuaara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura niajaniya, Pueyaso niishitiojosano canaa. Cunoori tarijia pa niishishoo. ² Cante Pueyaso niishitiaja jiitiaani, cuno cuaara quiiria seetanujuanaa Pueyaso miiniu panishano panijia, na rupaa na pohuatanura puetunu maninijanaa. ³ Niajaniya, tamasa pueyajuhuj jaara sequenu paniya taamueca pohuatanate janiyani, quiria, naajaa. Mijiria nequesoreena jaara cua nequesoreere cua niishitiojonujiniji, naajaa. ¿Janiyate sesa niishitiojoquiaani? Johuaj. Maja cua niishiniu. ⁴ Janiya jaara sesa miiriquiaa cua Jiyaniijara cua poonijosacarini, majaari cua niishiniu. Majaari coojia macuhujenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijaja na naata sequenu taa cua quiquiaarini. ⁵ Naaratej, maja nia rimiaaquenu tamonuucua, Jesucristo tiuquiyaquishacariuhua pocua. Nia sashiri. Pa Jiyaniijia jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniyajaariuhuj casaara pa miiquiaari puetunu pa miishanojuanaani.

Cuno quishacari, pa Jiyaniijaari maninia pohuatanutaniya cante maninia miijia quiriquiaa mijiria na quishacarini.

⁶ Cua tojitiare cuarta Jesuucua tiuuniaanaa. Janiyari nareja nia pohuatariquiaa Apolojinijini, janiyajiniijihuhaj, maninia nia niishiniuria casaa cua niishitiojiya nijaniyani. Naacuaajitij, nia niishitiojoriquiaanijia saa Pueyaso rupaa nia tojiti-nura suraatiaja. Majaari socua tamonu niishitio-josano nia tojiniu. Naajuhuj, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriiriaj, na shuquiri-tiniuucua janiya”. Maja naate pueyanaa. Mariy-ata nia tojitiare puetunu Pueyaso jiyaramiquis-hano pueyajanaa, seetanujuanaa nojori pohu-atasacari Pueyaso rupaa. ⁷ ¿Niajanियariuhuj? ¿Taa nia sequeya tama nia cuaqueyajiniijiaajani? ¿Ni-aateeri socua maninia pueya tamasacajiniji, socua niishijiacajuhuj? Majaruhua. Naajaa, niaa jaara seetanujuanaa socua niishijiacacara quiri tamonu-jiniji, ¿taa jiyano-hua niishijiacacara nia quiquia-nuni? ¿Tamajaajatee? ¡Maja tamajaaja! Niaacua-jaari Pueyaso niishitiaja jiiitiaa. Naaratej, maja nia jiyaniniu niaa socua maninia pueya tamasaca pueyajiniji, tama nia niishishanotajaaja.

⁸ Niaa jiyoteeri jiyaniya niaa tari cutara niishijiacacara quirii. Niaa jiyoteeri jiyaniyajuhuj, niaa tari jiiitiaa puetunu Pueyaso niqitionu panishanojuanaa nijaniya. Naajuhuj, niaa jiyoteeri jiyaniya Pueyasoori nia jiyateree jiyaniijanucua nia quiniuria. Niaa naasucuaari canaa shocotaree tari. ¿Naatejaaratej?

Seetanujuanaa naara nia jiyateriquiani, canaa quiniuria niarta jiyaniijianucujuhuaaj, shuquiriaatia pa quiniuria mariyata. ⁹ Janiyari cuarta Jesucristo jiyaramiquishanoocua niishiriojoriquiaani, Pueyaso naasucuaari canaa jiyatequiaari juhua najuhuaana quijiacara, saa puecoosocoriquianojua. Canaa naasucuaari naa quiya mijiriani, puetunu pueyajanaa shootianura canaa, Pueyaso seya shootianura canaajuhuaaj. ¹⁰ Canaa tojitiasacari Cristo, canaa naasucuaari niishiyashijiaca quiya tamasacarani. Niajanियari saniniuujia niishijiaca quiya tamasacara, Jesucristo nia rupuesacari. Canaa naasucuaari Pueyaso muerasu sasaca quiya saajani. Niaari saniniuujia Pueyaso muerasu cumueeca quiya tama nia niqiarajaaja. Pueya jiyoteeri nia shuquiritiaa. Canaari saniniuujia saaja rerequetesano quiyani, pueya soosanojuhuaaj. ¹¹ Canaari pueyaracaanu miaajequiaajaani. Canaari jiyamuequiaajaaniuhuaaj. Canaa cushishano toqueniyojuaari jiyareta sesaruqueniyojua. Pueyari canaa miiquiaa taraatiani. Shaaquiiri canaa tia, canaa rucoojonuucua pueyaracaanu. ¹² Canaari samareequiaani pueyaracaanu canaa poonijosacari tama canaa juaashiquiatajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejeretaquiaa juhuajaniya saajani. Majaari canaa naminiu quiquiaa saniniuujia nojori. ¹³ Pueya jaara tamasaca niqiara rimiaaquequiaa canaajiniji, canaari nojoritia jeecatoonu saniquiaa juucuanii.

Pueyari canaa jiyatequiaa juhua rucucuarani. Canaari naa quiyajaa nojoririani.

¹⁴ Naa cua naajiosacari niaacuaratej, majaari cua cararonu paniniu niajaniya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. ¹⁵ Niaa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Nia tojitasacari Jesucristo rupaa cua pohuatasacari niajaniya, niaari Pueyaso muerasura quiquiaari. ¹⁶ Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniuriajuhuaj.

¹⁷ Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajiniajanaacuaani. Naa nia rootanutaniyari nia niishiniuhuara maninia cua niishitiojosano niajaniya tarijia. Nojuajaari nia pohuatanutaniyajuhuaaj taa quijia cua quiyani cua tojishacari pa Jiyaniijia Jesucristo, naa maninia nia miiniuriajuhuaj.

¹⁸ Noojiaqueya niajaniyajiniinioori shuquiriaatia quiya, juhua jiyaniijianucua nojori jiyate-sacari tama na cuaqueyajaaja. Nojoriiri naa miriiqui nojori jiyaniishacari maja naasucuaari cua tacatenu quiniutianiuhua, cua niqiniuhuara niajaniya socua. ¹⁹ Janiyacuajaari niaacua naque-

rejija tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujiuniutianiyani, cua niishiniuria casaate nojorini, maja naa sacuaraatia nojori quiniuriatej. ¿Cumaacarate nojori, saaja pocujaca soj? ²⁰ ¿Canteeri seetanujuanaa Pueyaso pueyanoni? ¿Saaja pocujatej? ¡Maja pocujaja! Cante Pueyaso Sohuanu jiiitiaa na cumaquiriquiano Jesucristo na tojinuriani, cunoori seetanujuanaa Pueyaso pueyano cutara. ²¹ Nia niishiriojore, cuarta Jesuucua tiuniaanaa. ¿Taa nia paniya cua miiniuria niajaniya cua quiasacari niaacuani? ¿Niaateeri paniya cua saniitionura niajaniya, jacaria cua niishitijonura niajaniya cua paniniutia soj? ¿Taa nia paniyani?

5

Na que niquiocuata quijiajiniji pohuatasano

¹ Nijaniyajiniji pohuatasaarucuaa taraatianijia. Tamonu nijaniyajinijionaaari jijanohua sesa miya. ¡Na que niquiocuata quiyaquiniaari! ¡Pueyanaa, cuno miishanoori socua jijanohua cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. ² Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jiiitiaaruhua? ¡Niaa cuaraa na tacaatiaara! Cuno sesa miijia cuaraa taanuusaaria nia tajiniji, maja na cojinuria socua nijaniya nia rerejosacari. ³ Cua tojiri taa

pa miiniutianiyani. Janiyari maja cua quiniu niaata. Naajaa, coojiaari niaata quiya cua niishiriojosacari niajaniya. Naacujitij, janiyari juhua nia tajinia quiyani. Naacujitij, janiyari tari cuno sesa miijia saniniujiuriini. ⁴⁻⁵ Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Coojiaari niaata quiniutianiya naa nia miishacari pa Jiyaniijia Jesucristo cumaquishacari niajaniya. Naacujitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhua, Pueyaso tojijiara na quiniuhua. Naacujitij, pa Jiyaniijia Jesucristo muetasacariuhua pocua, nojuajaari samiitianishaanutaniuhujuhua puetunu Pueyaso muerasutajanaa.

⁶ Cuarta Jesucua tiunianaana, ¿taate nia naata shuquiriaatia quiniu tamajaajani, naa sesa miijia quishacari nia tajinatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaacua paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojua miniquiootasanojuanaari. Naajuhuj, sesa miijia jaara sequeyaquishaare na miishano, sesa na miishanoori socua paaquenutaniya.

⁷ Tariija, Pueyasoori pa supuetanaa Judiocuaca rootaquiaari puetunu na pan poreetejanaa nojori jatanura puetunu marijiajanaa. Nojoriiri naa rootasaaquiaari saaja poreetesoo pan

nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori miitushanojuanaa, nojori rupuenura Pueyaso. Naajuhuj quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuacaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. ⁸ Naa Pueyaso pa cojishacari quiarijiatej, tojetaarucujanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

⁹ Pueyanaa, janiyari tari niaacuara naajiocanuni cua sequenura nijaniya, maja nia cojinuria sesoriquia pueya, cuno pojori canapute na camishoo maaji numuetucuquiaani. ¹⁰ Naa cua sequesacari nijaniyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacuajijianaa rupertenu. Nio jiyacua, pueyari naa sesa miijiacua quiya: nojoriiri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panis-

hanooouajaaja jiaatiaquiaa puera, maja Pueya-soocua. ¹¹ Cua tojitiare casaa cua sequecanu tari niajaniani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji nu-muetucujuquiaa. Naajuhuj, majaari nia cojiniu nooj cante casamiriacara quiniuucua jiaatiaquiaani. Majaari nia cojiniu nooj cante tama na panishanooouajaaja jiaatiaquiaajaaniuhuj, maja Pueyasoooua. Majaari nia cojiniu narta pueya sesacaja. Majaari nia cojiniu mashaasequejojua. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. ¹²⁻¹³ Naa cua sequesacari niajaniatej, majaari cua sequenu quiriquiaa tamasa pueyajiniji, canapuetucujaja maja Pueyaso muerasuni. ¿Paate nojori nequesoreenaani? Maja. Pueyasooouajaari nojori saniniujiuniutianiya. Pajaniya cumaati parta Pueyaso pueya saniniujuquiaani, nojori jaara sesa miriquia. Naaratej, nia jatara cuno sesa miiija nia tajiniji, noo cante sacuaraatia na que niquiocuaata quiyacujani.

6

Sesa miiija cuara nequesoreesaaria narta Pueyaso muerasu niqiara

¹ ¿Seetanutejanaa naa niajanijajiniji pueya pohuatasanojuhuj? Niarta Jesuucua tiuunia jaara sesa miiri niajaninya, niaanaari

Pueyaso niishiyashijiaca nequesoreenaa tonujuquiaa nocuara. ¿Casaara tamajaaja niarta Pueyaso muerasu niquiara nia jeecatoyaquiquiaani? ² ¿Niaate niishiyaquiya, Pueyaso muerasuuri Pueyaso niishiyashijiaca nequesoreeriquianocuaja, Pueyaso sanini-ujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarjia niarta Pueyaso muerasu nequesoreenu tamajaaja, nojori jaara sesa miiri shiitianiyojua? ³ ¿Majate nia niishiniujiuhuj, paari Pueyaso seya nequesoreeriquianojuhuj? Pueyaso jaara pa nequesoreetenutaniya na seya na tojiyashijiaca, ¿majate quiarjia nia naata maninia nequesoreenu niarta Pueyaso muerasu mijiria? ⁴ Niaa jaara nia tapueyocuacaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jiiñanaa. ⁵ Naa nia sequeyanijia cua cararonura quenaaja nijaniya, cua niishiriojotenura nijaniyajuhuj. ¿Seetanjuanaa tojetaarucujanaa shaaquiti niishijia nijaniyajinijinio, cante na naata nia tonujutoosacari nequesoreenu nijaniya maniniani? ¡Quiya jiyotucuaajaari! ⁶ Nijaniyanaari tama niarta Jesuucua tiunuaacuarajaaja tonujutoojoquiaa Pueyaso niishiyashijiaca nequesoreenaa niquiara. Naa nia miishacaritij, ¡niaari sesa miiquiaa pueyanaa! ⁷ Niaari jiyanojua jiyajeneya nia juayonuujutacari. Niaa jaara sesa miishaare, niaa cuara jiyanojootoora saniniuujia, nia casami jaara no-

huasesaarejuhuaj. ⁸ Niajaniyarijiataj, ¡niaari saaja sesa miiquiaacujua! ¡Niaanaari niarta Pueyaso muerasu miiquiaa sesa! Niaanaari tama niarta Jesuucua tiuuniaajaaja nohuasejoquiaa, sesa miijiaca nia quiniuucua.

⁹⁻¹⁰ Maja tama nia cuaqueyajaaja nia sapojonu, pueyanaa. ¿Niaateeri niishiyaquia Pueyasoori maja na rijionu quiniutianiya sesa miijiaca na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapuate na camishoo maajipohua numuetucujuquiaani, naajuhuj, noo pojori, canapuate tama na panishanoocuaajaaja jiaatiaquiaani, maja Pueyasooocua. Quejoosaanutaniyajaariuhua noo pojori, canapuate narta pueyano niqiuocua numuetucujujani, naajuhuj, canapuate maajishuriutia quijia juhua maajitiani. Nohuasenuujuacaari quejoosaanutaniyajuhuj, noo pojorijuhuj canapuate pueyaracaanu socua casami paniquiaa tama nerajaajani. Mashaasequenuujuacaari puetunu quejoosaanutaniyajuhuj, tamasaca sesacajacanio, tamasacaacuara rimiaaquejacajuhuj. Naa quejoosaanutaniyajaariuhua noo pojori, canapuate nohuasejoquiaa na sapojonutani. Puetunu jiyano pueyajanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. ¹¹ Noojiaqueya niajanijajinijinoori jiyano sesa miijiaca pueya quiquiaari tarijia. Na nuhuaji, sesa nia miishanoori jeequesaaquiaari Jesucristoocua nia tiushacari. Pueyaso

Sohuanuuri nioojiajinia tiuquiquiaari, Pueyaso na tojitiniuria niajaniya. Naacujitij, nia rupuesacari Jesucristo, Pueyasoori nia jiyanooquiaari. Nia sequereeri: “Niaari saa maniniaja quiya cua niquiara”.

Pa cuaqueya cuaara quiiria saa Pueyasoraja

¹² Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujuanaa naacuj. Saniniuujia, majaari puetunu pa miiniu panishanojuanaa maninia na quiniu pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacaritij, na nuhuaji majaari pa naata pa jiiitishano casaa pa tarinitianu.

¹³ Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucujia saniniuurijia, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyajetanu, na nuhuaji, Pueyasoori na shaajanutaniya puetunujuanaa. ¿Pa cuaqueyariuhuj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa Jiyaniijiara, na panishano pa miiniuria. Naajuhuj, pa Jiyaniijiari pa cuaqueyara quiyacujua, na cumaquiniuria pajaniya, maninia pa quiniuria pueyaracaanu.

¹⁴ Naajuhuj, taa Pueyaso samiitiani quiaaricuaa

pa Jiyaniijia Jesu na cuaqueyatani, nojuajaari macujiniji naa pa samiitianiniutianiuhua na cumaacatajuhuaj.

¹⁵ ¿Niaateeri niishiyaquiyajuhua, Pueyaso Sohuanu quiniuucua poojiajinia, pa cuaqueyari seetanujuanaa pa Jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. ¡Cunoori jiyanohua sesa!

¹⁶ Pueyasocujaari coteenujuanaa na shipinishano pueyano sequequiaari:
“Quia camishacari maaji, niaari niquiriyatu cuaqueyara quiniutianiya”.

¿Niaateeri nio niishiyaquiya, cante paanatu numuetucureeni, Pueyasora, nojoriiri niquiriyatu cuaqueyaracara quiquii? ¹⁷ Naajuhua, paa jaara Jesucristo rupuereni, pa sohuanuuri rupuetoree na Sohuanuta, niquiriyatu sohuanuraca pa quiniuria Jesucristota.

¹⁸ Naaratej, nioojia nia tacatore maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniuujia, cante na camishoo maajipohua numuetucujuani, nojuaja cutaraari tama na cuaqueyajaaja sesoya. ¹⁹⁻²⁰ ¿Majateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanohua naquiya na miiniutia nia masereeri Neyanu na motesacari pocuara! Naacuajitij, Pueyasoori quiarijia pa camarnu quiya. Naaratej, quiarijia maja pa quiniu

tama pa cuaqueya camarujuaaja. Naaratej, pa shuquiritiri pa Pueyaso pa cuaqueyata, pa sohuanutajuhuj. Nojuacuajaari pa cuaqueya camaru, pa sohanu camarujuhuj.

7

Pablo rootasano pa caminiuria, camiyojua pa quiniuria soj

¹ Quiarijiani pueyanaa, cucuara nia naajiosanojinia nia nequesotasano riucuaereeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. ² Saniniuujia, quiarijiani, pueyari puera sesa miiniu niishiquiaa. Nocuaji pueya cuaara camiiria. Maajipohua cuaara camiiriajuhuj. ³ Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuj, neyaca cuaara na cuaqueya jamueyaquiiria necocua panishacari na numuetucusaanura. ⁴ Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujiuhuj. Necocuaari neyaca cuaqueya camaru cutara. ⁵ Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niquiocua nia tarijionu na panishacari na numuetucusaanura. Saniniuujia, jiyanohua Pueyaso nia secojonu panishacari, jiyacari

cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. ⁶ Nioori quiarijia maja niaara Pueyaso rootasano janiya. Janiyari nareja naa sequeya nijaniyani socua panaatia nia quiniuria. ⁷ Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacujani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

⁸ Camiyojua pueyanaa, mashiquiopuena, cua tojitiare: niaa jaara juhuajaniya quiya taa camiyojua cua quiyacuaani, niaari maninia quiniutianiya. ⁹ Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuaara camiiria. Socua maninia cutaraari nia caminiuria, maja maajiicua nia jiaatianura pueyaracaanu. ¹⁰ Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹ Cante neyaca carteyani, nojori cuaara jiyanootioora, na rupuetoonuuhara. Jaara maja na naata jiyanootioonu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: “Maja nia

cartenu nia niquiocua”.

¹² Quiarijiani, socua nia niishitiojoreeraj. Nioori tama cua niishitiojosanojuaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuaara jiiitaara maninianoj. Quia niquiocua jaara quiata quiniu panijajaa, majaari na cartenu. ¹³ Naajuhuaaj, maaji jaara Pueyaso tojiyashijia niyacaraca quiri, cuaara maninia jiiitaara neyaca. Majaari na cartenu, quia niyaca jaara quiata quiniu panirijia. ¹⁴ Cuarta Pueyaso muerasunaa, Pueyaso tojiyashijiaca pueya nia jiyanoori, nojori jaara Jesuucua tiuuniaata caminio quiya. Nojoriiri seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, nijaniya cuaara neyaca jiyanooria necocua quiniuucua niarta Pueyaso pueyano. Nareja nia niquirinioj, niaata na rerejonu panishacari. Naajuhuaaj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacaritij, necocua cuaara nareja niquishaariajuhuaaj, na rerejosacari niaata. Naajuhuaaj, maja rimiajata nia niquiniu necohua. Necohuari maniniacuaja Pueyasora, maja juhua tama maaji muetusanojuaaja. ¹⁵⁻¹⁶ Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari nijaniya, niaari juhua camishoo quiriohua. Majaari socua nia tojiniu coteenu nia niyaca, coteenu nia niquiocuanio. ¡Maja cutaraari nia cartenunoj!

Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueyasoori paniquiaa juhuajaniya pa quiniuria, camishano, artesano soj.

¹⁷ Cuarta Jesuucua tiuuniaanaa, taa nia quiquiaari Pueyaso sequesacari niajaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiaacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijosano quiquiaarini, cunocuajaari Pueyaso panishano quiquiaari niaara. ¹⁸ Naacuajitij, cante tarijia na cararaatiuuquia co miatesano quiquiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiuushacari quiarijia. Naajuhuj, cante miatesoo quiquiaari Pueyaso sequesacari na pueyano na quiniuriani, cuno cuaara quiiria naajuhuj. ¹⁹ Cante Judio pueyano na quiniuria miatesaaquiaarini, naajaa. Cante miatesoo quiyani, naajaa. Saaja maninia cutaraari pa tojitianura Pueyaso niishitiojosano pajaniya. ²⁰ Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria. ²¹ Cante

poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhua janiya nia poonijiore saaja. Saniniuujia, jaara nia naata quiriquia cartesano pueyano nia camarnujiniji, maniniacuajaari. ²² Cante poonitijiotasusano pueyano quiquiaari Pueyaso sequesacari nia janiya na muerasu nia quiniuriani, naajaa, niaari seetanujuanaa cartesano pueya quiya pa Jiyaniijara. Naajuhua j, cante camarnuuju quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijosano pueya quiya cutara. ²³ Pueyasoori jiyano hua naquiya miiquiaari na cusojuasacari Neyanuniyojua, na masenura nia janiya, na muerasu nia quiniuria. Nia masequiaariiri tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarijia saa Pueyasoraja nia quiri maninia. ²⁴ Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu nia janiya.

²⁵ Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuquuaa na sequenu panishano cua caminiujiuniuria nia janiya, na Sohuanu cumaquishacari janiya. ²⁶ Naacuaajitij, naa nia sequeyanijia: niaacuajaari niishiya, quiarijiani, jiyano hua puereeta quishacari. Nocua j

niajaniya cuaara quiiria taa nia quiyacuajani. ²⁷ Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. ²⁸ Naajaa, mashaja jaara camiri, cunoori maja sesa. Naajuhuj, niyacoo jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniuucua mijiria quiarijiani. Majaari cua paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniuucua quiarijiani.

²⁹ Cuarta Pueyaso muerasunaa, niajaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyanohua pa tojitiare pa Jiyaniiija. Naacuajitij, cante niquiocuaraca quiyani, majaari nocua nia niishiriojonu puera. ³⁰ Cante na shaajasanooocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuj. Cante casami niquitiojojua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasooocua. ³¹ Canapuate niishijiacani, queraatia casami na masejonura mijiriani, nojori cuaara niishiiria maja casami panijiaca nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu.

Saaja Pueyaso nia tojiri cutara.

³² Janiyari paniyani mijiria casaacua tacayashijiaca nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijiaacua niishiriojonu na tojiniuria maninia, pa Jiyaniijia na shuquiritiniuria.

³³ Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria.

³⁴ Naacuajitij, noojia niqijioteyari. Naajuhuj, camishoo maajiiri pa Jiyaniijiaacua niishiriojoquiaa maninia, tama na cuaqueya na cojuasacarijiaaja Jesucristora, nera na poonijionura puetunu noojiatajanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

³⁵ Janiyari naa nia sequeyani socua shuquiri-aatia nia quiniuria. Maja cua taajetenu paniniu nijaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojtianura maninia. Naa jaara cua niishitiojosano tojiri, nia naata pa Jiyaniijia to-jiniu maninia. Naacuajitij, niaari nioojia niqijioteyaquiniutianiya.

³⁶ Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuara miiria taa na miiniu paniyacuajani. Camishocoriquiano maaraja, cuara camitioora. Quia niyatu jaara camiri, majaari sesa. ³⁷ Cante saniniuujia maja noojia niqijioteyaquiya na niishiriojosacari

neyatuucuari, cunoori maninia miiniutianiya na camitiyaquishacari, jaara na naata neyatu cojuanu maninia. ³⁸ Naacuajitij, cante neyatu camitiriini, maninia miyari. Cante neyatu camitiyaquiyajaaniuhua, nojuajaari socua maninia miya. Naacuajitij, cuno neyatuuri na naata Pueyaso panishano miiniu socua, camishoo na quishacari.

³⁹ Camishano maaji cuara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na panishacari, cuara camiiria cana na caminiu paniyacujani. Jaara caminiu paniri, cuara camiiria Pueyasocua tiuujia pueyanota cutara. ⁴⁰ Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

8

¿Maniniate cuno shu pa miaquenura, seya jaara puecoosano quiri nareja shipinishano casaacuara, juhua Pueyasocuarajanaa?

¹ Cuarta Jesuucua tiuniaa pueyanaa, janiya quiarijia nia niishitiojonutaniyani teyano pa miaquesanojinijiti puereshiyani. Pueyaso niishiyashijiacaari na miaquesocoriquiano seya puecoonu niishijia shipinishano casaacuara juhua Pueyasocuarara. Pueyari nequesotaquiaa, ¿maniniate cuno shu, Pueyaso muerasu

miaquesocoriquianojuhuaj, cuno seru jaara taucuaca jiyaniushano cumaacaraca quijiaacuara mosano quiri? ¡Janiya cutaraari maja cua miaquenunoj! Nia pohuatareera casaara cua miaqueyaquiquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhuanaj, nojori jiyaniushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanoocua. Cante narta pueya paniquiaani, cunoori narta pueyacua niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ² Naacujitij, cante tama na cuaqueyajaaja jiyaniya niishijiani, cunoori juhuanojuaja maja niishijia seetanujuanaa. ³ Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

⁴ Juhuanajuajaari maja cua riucuanu nia niishiniu panishano: “¿Maninatenaari cuno shu pa miaquenu, seru jaara pueya jiyaniushano pueyasoocuara mosano quiri?” ¿Casaatejaara cuno nojori jiyaniushano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jiyaniushano

pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuacaanu Quijia. Maja socua tamonu quiniu juhua nojuaja. ⁵ Tamasaca pueyari jiyaniya queraatia cumaacaraca quijiacaari quiya juhua Pueyaso, jiya cajiniocua, mijirianio. Nojoriiri na jiyatequiaa nojori cojuanara, nojori cumaquiriquianojuhuaj. ⁶ Naajaa, paari niishiyani saa niquiriyatu Pueyasojuaari quiya. Nojuacuajaari pa Que Pueyaso, pa shipinia. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuhuj. Cunoori pa Jiyaniija Jesucristo. Na Queeri na shipinitiquiaari puetunu na shipinishanojuanaa. Pajaniyajuhuj, paari rishiyani saaja na cumaquishacari pajaniya.

⁷ Noojiaqueya Pueyaso pueyari saniniuujia jiyaniyajaa taucuaca shipinijosano casaari seetanujuanaa cumaacaraca quijiaca juhua Pueyasojuhuj. Nojoriiri najuhuaana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori jaara shu miaquere teyanote mosaaree nojori jiyanishano cumaacaraca quiijaacuarani, nojori miaquenu nuhuaji, noojia niquijioteyari. Nojoriiri tama sequeyajaaja: “¡Janiya naasucuaari sesa miirii Pueyaso niquiarani!” Naacuajitij, nojoriiri noojia macuhujetequiaa. ⁸ Pueyanaa, paacuajaari niishiyani, casaa pa miaquequiaani, naajaa. Pa miaquesanoori maja na naata

Pueyaso jiyanootiniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhuj, cante na miaquequiaani, majaari socua sesa pueyanora na quiniujuhuaj. ⁹⁻¹¹ Niaacuajaari jiyanoohua tiuquiaa Pueyasocua. Naacuajitij, niaa naasucuaari na naata juhuajaniya tiuquiniu cuno shu miaquenura nojori jiyanishano pueyaso quiquiojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuajitij, nia naata nocuara mosano seru miaquenu juhuajaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari nijaniya, tamajaaja sequenutaniyari: “¡Jaj! ¡Nojoriqui cuno shu miaquenuyacuaa! Saniriirijataj”. Naa sequejatej, nojuajaari jiyaniyajaa cuno miaquesanoori mosaaree seetanujuanaa tamonu cumaacaraca quijiaacuara. Naacuajitij, na sanishacariuhua cuno shu miaquenu, tamajaaja noojia macuhujanutaniyari. Naacuajitij, niari niarta Pueyaso pueyano sesoya, na niquiara nia miaquesacari cuno shu. Na niquiniuucua nijaniya cuno shu miaquenuyano, nojuajaari cunora na miaquereejuhuj. Saniniuujia, nojuajaari juhuanujuaja maja jiyanoohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jiyanooshaanura. Nijaniyari saniniuujia quiarijia na sesorohuacuhua nia niishishanota.

Nocuaijani janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuariuhua, na rupuesacari niajaniya. ¹² Nia miaquesacari, niaari na pueresano shu na miaqueteya. Naacuajitij, noojiaari macuhajenutaniya. Naacuajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhua, naa nia sesosacari tama na pueyanojuaaja. ¹³ ¿Taa nia sequeyani pueyanaa? ¿Maninate shu pa miaquenu, seya jaara taucuaca jiyaniishano pueyasooacara puecoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojiniji. Saaja maninia miijiacara nia jiyateriquiani, taa cua miiquiaa saaja maniniacuaani.

9

Taa quijia Pablo quiquiaarini, Jesucristo jiyaramiquishano na quishacari

¹ Janiya jaara cuno shu miaquenu paniyani, cua naata miaquenu cua panishano. Naajuhua, cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacujani. Janiyacuajaari Jesucristo jiyaramiquishanojaaniuhua. Seetanujuanaa cua namijiata Jesucristo niquiquiaarinijia. Nojuajaari cua jiyatequiaari na jiyaramiquishano cua quiniuria. Naajuhua, cua pohuatasacari Jesucristojiniji nia niquiara, niaari na muerasura quiquiaari cua pohuatasanoocua

nia tiuushacari. Naacuajitij niishishiyari janiyari Jesucristo jiyaramiquishanojaaniuhuj. ² Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesuucua tiuquiaari nia tojishacari cua pohuatasano nojuajiniji. Naacuajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniuucua, cua naata miiniujuhuaj taa cuarta Jesu jiyaramiquishano pueya miiquiaacuaani.

³ Tamonu jaara cua nequesoreere taa cua miiquiaani, janiyari saaja naa na riucuaquiaani: ⁴ “Pueyasoori sequequiaari, na jiyaramiquishano pueya cuaara niqutiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niqutiojonura canaa panishano. Naajaa, majaari canaa masenu quiquiaa canaa panishano nijaniyajiniji, janiya, Bernabeenio. ⁵ Naajuhuj, canaa jaara niquiocuaraca quiriquiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuaani. Pa Jiyaniijia Jesu tapueyocuacaari naa miiquiaajuhuj. Pedrojuanaari necocuata rucuanajoquiaajuhuj, Jesucristo rupaa na poojotasacari. Naajaa, majaari naa canaa miiniu quiquiaaquij. ⁶ Jesucristoori sequequiaarijuhuaj: “Cua jiyaramiquishano pueya cuaara niqutiosaaria cumaneeca, na panishano nojori masetajara”. ¿Niaateeri jiyaniya cuno sequesano maja quiria,

maja Bernabeerajuhuj? ¡Cunocujaari naa sequesaaquiaari canaarajuhuj! Naaratej, canaa jaara naa paniriquiani, canaa maara canaa panishano masere nijaniyajinijini, canaa niishitiojonuucua nijaniya. Naajaa, canaari tama canaa juaashiquiatajaaja poonijioquiaani, canaa panishano canaa masetajara.

⁷ ¿Soldadoteeri tamonu poonijosano jiiitaja, na miaquesano na masetajara? ¡Maja! Soldadohua jiyaniijaari na niqutiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhuaji na natau mi-anutaniyari na poonijosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiririnij! Na ratuyacuaaquiniatejaj. ¿Maatucua casaara najuhuaana seesaareerini? ¿Canaarijataj? Canaa jaara naa paniriquiani, canaa naata nia masenu canaa panishano nijaniyajiniji. Naajaa, majaari canaa mashiniquijionu quiquiaa quenaaja canaa panishano nijaniyajiniji. Canaari nareja poonijioquiaa tama canaa juaashiquiatajanijia, Jesucristo rupaa canaa pohuatasacari nijaniya.

⁸ Nio cua pohuatasano nijaniyani, majaari tama canaa niishiriojosanojuaaja. Nio niishitiojosanoori tariucuacaanu Pueyaso Rupaa naajosanojinia quiyajuhuj, taa cua sequeriquiaacuajani. ⁹ Supuetana Moisés caminiujiushano Pueyasojinijiiri naa naajiotasaaquiaariti:

“Maja quia juunu rupaa quia seecutanu maja na miaquenura quia carojotasano, quiaa jaara na rapijoteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja! ¹⁰ Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuaara nojori niqutiojoora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiriirinij. Na camaruuri niishiya na poonijosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhuaaj? Jaa. Niishiyacuajaari na mianutaniyari.

¹¹ Naajaa, niaata cua quishacari, canaari naa poonijioriquiaa Pueyasorani, nioojiaca canaa cumaquiniuria maninia. Naacuajitij, canaa cuaara niqutiojosaaria saniniuuja canaa panishano. Naajaa, majaari canaa paniniu canaa panishano nia niqutionura canaa. ¹² Tamasaca pueya niishitiojosacari niajaniya, niaa cutaraari nojori niqutiojoquiaa nojori panishano. Canaari saniya coteenujanaa pahuataquiaari Jesucristo rupaa niajaniyani. ¿Majateeri coteenu canaa niqutiosaanu canaa panishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia niajaniya, canaa jiitiaaquishacari canaa panishano. Canaari naa miiquiaaritij, niaa mariqui Jesucristo rupaa tojiniu paniyaquiriiri canaa taajetesacari niajaniya, pueyaracaanu canaa mashiniquijosacari canaa panishano

niajaniyajiniji.

¹³ Niaacuajaari niishiyajuhuj, Jerusalén tiacajinia Pueyaso Secojoua tiajinia, cuarta Judiocuaca miaquesocoriquianoori puecoosaaquiaa Pueyasooacara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhuj, shu camaruuri secojojuajinia poonijionaa niqutioquiaa nojori miaquesocoriquianojuhuaj? Naacuajitij, Pueyaso secojojuaja tiajinia poonijionaari miaquesanoraca quiquiaajuhuj. ¹⁴ Pa Jiyaniijia Jesucristoori na rupaa pohuatanaara naa sequequiaarijuhuaj: “Cua rupaa pohuatanaa cuaara niqutiojosaaria na panishano pueyaracaanu”. ¹⁵ Naacuajitij, cua naata puetunu cua panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia niajaniya cua panishano cua masetajara. Niaa naasucuaari jiyaniya janiyari quiaritia niaacuara naajioree nioni, cua shiniujiuniuria niajaniya nia niqutiojonura janiya cua panishano. ¡Maja! Majaari cua paniniu nia niqutionura janiya cua panishano. Janiya jaara titiaare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua panishano cua maseyaquiniutia niajaniyajiniji. Naacuajitij, janiyari tamajaaja shuquiriaatia quiya Pueyaso niquliarani.

¹⁶ Cua tojitianaa jaara niqutioiore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa.

Janiya jaara pahuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniuucua nojuaja. Cua pahuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pahuatanura. Cunoori maja tama cua niishiriojosano cua miiniuriajaaja. ¹⁷ Majaari cua sequenu quiquiaari cua Jiyaniijia: “Cua Jiyaniijianaa, quia rupaa pahuatareera quia-janiyara”. Janiya jaara naa na sequequiaarini, cua Jiyaniijia maara cua niqutiore cua poonijosanojiniji nera, na shuquiritiasacari janiya. Saniniuujia, tama na panishacarijaaja cua Jiyaniijiajanaacuajaari cua jiyaroquiaari na rupaa cua pahuatanura. Cunora, majaari cua naata na tarijionu. Janiyacuajaari na seruni. ¹⁸ Naacuajitij, ¿taa cua miya socuani, cua Jiyaniijia cua shuquiritiniuria socuani? Naa miiquiaacuajanijia, nareja poonijioquiaanijia tama cua juaashiquiatajaaja cua panishano cua jiitianura, na rupaa cua pahuatasacari. Naaratej, majaari cua sequenu quiquiaa cua tojitianaa, nojori niqutiojonura janiya cua panishano. Jesucristocuajaari sequequiaari na rupaa pahuatanaa cuaara niqutiosaaria na panishano. Naajaa, majaari naa cua sequenu quiquiaa nijaniya. Naacuajiti cua naata pa Jiyaniijia shuqiritiniu socua, cua pahuatasacari na rupaa cua maseyaquishacari cua panishano cua tojitianaajiniji. Naacuajitij, janiyari shuqiriatia pahuataquiaa Pueyaso rupaa pa Jiyaniijiarani.

¹⁹ Majaari pueya niqutionu quiquiaa janiya na jiitiasanojiniji cua niishitiojonuucua nojori. Naacuajitij, janiyari maja juhua

nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujuanaa cua quiniuriani, socua pueya quiniuria pa Jiyaniijia Jesucristo tojtianaara. ²⁰ Jesucristo rupaa cua pohuatasacari cuarta Judiocuaca niqiuara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niqiuarani. Naacujitij, socua Judiocuacaari Jesucristo rupaa tojtiaa. Jesucristoocua cua tiuushacari, janiyari maja socua cua quiniu juhua cua supuetanaa Judiocuaca rootasano tojijia. Naajaa, na tojiquiaajaanijia cua quishacari cuarta Judiocuacata, noo pojoritiatej cante cuno rootasano tojtiaajaani. Naacujitij, cua quishacari juhua nojori, nojoriiri socua cua tojtiaa cua pohuatasacari Jesucristojiniji. ²¹ Naajuhuj, cua quishacari tamasa pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiyaquiquiaajuhuj, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niqiuarani. Naajaa, Pueyaso rootasano tojiquiaa pueyaracaanu cutaranijia. Naajuhuj, puetunu Jesucristo niishitiojosanojuanaa tojiquiaanijia. ²² Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na

supuetanaa rootasano. Naajaa, janiyari mariyata cuno najuhuana rootasano tojiquiaajuhua j nojoritia cua quishacari. Nojori jiyanihacari tamonu casaa sesa quiya, janiyari mariyata maja cua miiniu nojori pueresano casaa. Naacuajitij, cua naata nojori cumaquiniu maninia Pueyaso rupaata, nojori tojtiasacari janiya, juhua nojori cua quishacari. ²³ Janiyari puetunu naa miiquiaajanaani, socua pueya cua tojitiniuria Jesucristo rupaa. Naa maninia poonijioquiaa cua Jiyaniijiaranijia, cua masenura puetunu maninia na sequesanojuanaa na muerasura.

²⁴ Niaacuajaari niishiya taa pueya tacuarishiyajoquiaacuajani. Pueya netecuatusacari, puetunu pueyajanaari jyanohua netecuaturua jaarajaaja. Cante narta netecuaturanaa shocotajani, shanohua casaa niqitioshiyari. Ritiuuquia pueyanoori jyanohua shuquiriaatia quijia na shocotanutinijia na masesacari casaa. Naajuhua j pueyanaa, jyanohua nia poonijiore Pueyasora mijiria, shuquiriaatia nia masenura nia poonijosanojinijia na jiiitiasanojinijia jiyocuacaanu.

²⁵ Naajuhua j, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuni, cunoori saaja shanohua nacaque jaamasujinijia shitiasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqitiosanota pajaniya, paa jaara

maninia miiri mijiria pa quishacarini. Naaratej, pa tarinitiare puetunu najuhuana tama pa miiniu panishanojuanaa, pa shuquiritiniuria pa Pueyaso.

²⁶ Pueya netecuatusacari, netecuatunaa cuaara niishiiria tee netenu puequeetu quiyani. Majaari najuhuana na camarucuneejonu. Naajuhuj, cua poonijosacari Pueyasora, majaari cua niqijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuj, pa cartere najuhuana pa miiijosano. Saaja pa niishiriojore Pueya-soocua, maninia pa tojiniuria nojuaja. ²⁷ Janiyari jiyanohua saniniujiuquiaa maja cua miiniuria tama cua cuaqueya miiniu panishanojuaaani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari queraatia pueya niishitiojoquiaari Pueyaso rupaani. Janiya jaara tama cua niishitiojosanojuaja tojiyaquirini, Pueyaso mariqui cua cartereeri, maja na rupaa cua pohuatanura socua.

10

Supuetanaa Israel pueya miishanoori pajaniyara naajiotasaaquiaari pa niishiniuria maninia

¹ Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucuanijosacari pueyaracaanu cariiquia jiyajinia. Majaari nia niyajetanu niaa mariqui Pueyaso tojiyashijiara quiriohuajuhuj. Nojori mashishacari Egipto jiyajiniji, Pueyasoori cohuaja najaca shipiniquiaari nojori na

cojuanura, nojori puetariquianojuhuaj. Pueyasoori puereetuuca shoniniacu caminia raquitiaquiaari nojori nuura caminia cajiniocua. Naacuajitij, puetunu pueyajanaari niuutiaquiaari joojuashiquio. ² Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuuca caminia tajiniaaco, cohujaja najaca cariquiaconio. Majaari socua na quituniu quiquiaari Egipto pueya seya. ³ Puetunu nojorijianaari jiya cajiniocuaji casaa miaquenuujua, Pueyaso tinishano nojori miaquesocoriquiano pueyaracaanu cuno cariiquia jiyajinia nojori rucuanijosacari. ⁴ Naajuhujaj, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohujaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵ Puetunu cuno supuetanaa Israel pueyajanaari naa maninia cojuasano quiquiaari cariiquia jiyajinia. Naajaa, quera puetunu nojorijianaari Pueyaso tojitiaashijia quiquiaari saaja. Pueyasoori cunora nojori shuquiritiaaquiquiaari. Naaratej nojori cusojuanuuriquiaari cuno cariiquia jiyajinia nojori camarucuneetasacari pueyaracaanu, cuuara puequequiaarijiaatijia puetunu cuno tojiyashijiacajanaa.

⁶ Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijiniijiri puetunu naajiotasaaquiaarijanaa

pajaniyara, pa niishiniuria maja sesa casaacua pa jiaatianurajuhuj. ⁷ Shushajanaa nojori coteesacari rucuanenu cariiquia jiyaco, noojiaqueya nojorijinijinioori caapiqui casaa shipiniquiaari orojiniji juhua juunu niquishano. Nojoriiri tama nojori shipinijosano casaajaaja sequequiaari: “Nioori pa Pueyasohua, pa mashiquiniaa Egipto jiyajinia pa camarucuaacujaji”. Naacujajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaaritij:

“Pueyari cajitiurii queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miitiuquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸ Na nuhuaji, tamacari, noojiaqueya nojorijinijinioori sesa miiquiaari taatujuritia, cararaatia taucuaca miishacari nojori shuquirishacari na shipinishano casaa tacoji. Pueyasoori nocujaji naa sequequiaari: “¡Cuaara puecoosaaria cuno sesa miijiaca!” Cunora, veintitrés mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhuj, taa nojori miiquiaaricuaa taatujuritiani.

⁹ Na nuhuaji, noojiaqueya nojorijinijinioori Pueyasota juaaquiouquiaari, tamonu miaquesanoocua nojori jiaatiasacari, puera nojori jishacari nojori miaquesano. Nocujaji Pueyasoori sacocua satejoquiaari cuno pueya. Queraatia pueyari cusonuuquiaari. Naaratej pueyanaa,

maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

¹⁰ Tamacari, noojiaqueya cuno pueyajinijini-oori Moisésta juayonuutaquiaari. Moisés cuajaari nojori jitianara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajiaca na cusojuanura. Queraatia pueyari cusu-uuquiaari jiyacari. Naaratej pueyanaa, ma-jaari pa juaatianu pa jiyaniijianucua.

¹¹ Puetunu pa supuetanaajiniji naajiotasano-juanaari tariucuacaanu naajiotasaaquiaari, pa numootesaanura quiarijiani, quera pa Jiyani-ijia muetasacariuhua. ¹² Naaratej pueyanaa, tama nia cuaqueyajaaja nia cojuare nia jiyani-ishacari niaari Pueyaso tojijia seetanu cutara-janaa, niaa mariqui sesa miiriiri, juhuajaniya nia quishacari tamajaaja. ¹³ Niaari mariyata sanini-ujiushaaquiaajuhua, taa puetunu parta Pueyaso pueyajanaa saniniujiushaaquiaacuaani. Naajaa, nia naata Pueyasocua tiuuniu maja puera nia saniniujiushaanura. Pueyasocujaari niishiya taate nia naata rejeretanuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quini-uhua nia taraatia nia miiniuucujaji. Naacuajiti pa naata rejeretanu, Pueyaso jaara Sesaaca saniniu-jiutiri pajaniya.

Maja pa kojiniu tamasaca, na miaquenuusacari na jiyaniutiushano na pueyasocuara na puecootusano

¹⁴ Cua panishano Pueyaso muerasunaa, maja nia tiuquitianu tamasaca pueya jiyaniutiushano

pueyaso quiquiojinia, na tojitianaa nia cojiniuria, nojori shuquiritiasacari juaashiquiata shipinishano casaa Pueyaso niti. Maja nojori cojiniu, niaa mariqui saniitiosaareeri. ¹⁵ Niaacuajaari niishijiaca. Naaratej, nia niishiriojore cua seque-sanooqua.

¹⁶ Paa jaara rerejore pa Jiyaniijia cusonu juuca pa niishiniuriani, pa ratunu panishacari, paari sequequiaani: “Paacarasho canaa Jiyaniijianaa, quia nanacaari puetunu canaacuarajanaa shooquiaari”. Naa pa ratusacari cuarta Pueyaso muerasunaa, puetunu pajaniyajanaari pa Jiyaniijia rupuesano quiquiaani, na nanaca shoonuucua puetunu pocuarajanaa. Naajuhuaaj, pa miaquesacari, paari sequequiaani: “Canaa Jiyaniijianaa, quiaari quia cuaqueya nootunequiaari puetunu canaacuarajanaa”. Naa pa miaquesacari, puetunu pajaniyajanaari jatiqui pa Jiyaniijia cojiquiaani, na cuaqueya cusonuucua pocuara. ¹⁷ Cuno pan pa miaquesacari, puetunu pajaniyajanaari niquiriyatu panjiniji neecasequiaani. Naacuajitij, paari niishiyani puetunu pajaniyajanaari rupuetoono quiya pa Jiyaniijiatani, juhua niquiriyatu cuaqueyaja.

¹⁸ Nia niishiriojori quia taa Israel pueya miiquiaacuaani. Nojori miaquesacari Pueyasoocuaara na mosano Pueyaso niquiara, na niti nojori mosano seruuri juhua tama nojorijiaaja, Pueyaso jiyanooniuria nojori. Naacuajitij, nojoriiri na naata Pueyaso rupuenu, nojori secojonura nojuaja. ¹⁹ Jaara naa quiriritij, ¿taateerini, pueya jaara shipinijosano

casaacuara mosano shu miaquere? ¿Casaate pueya jiyanishano pueyasooacara mosano shuni? Nareja shucujaari. ¿Cumaacaraca quijiate cuno, pueya shipinishano casaa juhua Pueyasorani? ¡Maja! ²⁰ Naajaa, nia tojitiare casaa cua sequenutaniyani. ¡Pueyaso niishiyashijiaca pueyari na miaquesocoriquiano na seya puecooquiaa samaruhuacuara! Naa nojori miishanoniquitij, cunoori maja Pueyasora. Naacujitij, nojoriiri samaruhua rupuequiaa, maja Pueyaso. ¡Majaari cua paniniu nia rupuenura samaruhua! Nocujaji, maja Pueyaso niishiyashijiaca nia cojiniu cuno shu nia miaquenura. ²¹ Majaari pa naata pa Jiyaniijata rupuetoonu, samaruhuata pa rupuetootsacarijuhuaj. ¿Pueyasote samaruhuata cojitishiya? Pa Jiyaniijia cusonu juuca pa niishiniuria, ¿paateeri na sequesano miaquenutaniyani, samaruhuacuara mosano casaajuhuaaj? ¿Cojitishiyatee? ¡Maja pueyanaa! ²² ¿Paateeri pa Jiyaniijia paraca cojiniu paniyani, pa Jiyaniijia pa juaatiniuriani? ¿Pajaniyate socua cumueeca pa Jiyaniijiajinijini? ¿Majateeri nia puerenu pa Jiyaniijia saniitonu?

Taa pa miiniutianiyani

²³ Tari sequereecuajanijia, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. ²⁴ Naaratej, majaari pa niishiriojonu saaja maninia pa

quiniuria tamajaaja. Pa niishiriojore parta pueyacua, maninia nojori quiniuriajuhuaj. ²⁵⁻²⁶ Seetanujuanaari nio naajiosano: “Nio jiyari pa Jiyaniiija jiya, puetunu tii quijia casaajanaanio”. Naaratej, niaa jaara shu masere shu niqutiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyaniiija shipinishanocuajaari. Pa miaquesanoori maja na naata na sesonu pajaniya Pueyasora.

²⁷ Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhuajaniya nia miaquere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhujetereeri niaa jaara niishiri nia miaquesanoori shipinishano casaacuara mosano juhua Pueyasooacara. Juhuajaniya nia miaquere nareja. Puetunujuanaari pa Jiyaniiija shipinishanocuaja. ²⁸ Saniniuujia, nia cojinia jaara numootere nijaniya: “Nio shuuri mosaaree shipinishano casaacuara juhua Pueyasooacara”, majaari nia miaquenunoj, niaa jaara naa sequesaare. Maja nia miaquenunoj, nia cojinia mariqui na miaquerejaarihuaj na cojishacari nijaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacujitij, na miaquesacari nocuara mosano shu, noojia macuhujanutaniyari. ²⁹ Majaari nio cua

sequenu niaara. Niaacuaajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhujareeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamono pueyano pueresacari pa miaquenu panishano shu? ³⁰ Paa jaara Pueyaso sequereni ‘paacarasho’ cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacarini?” ³¹ Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijanaa Pueyaso nia shuquiritiniuria. ³² Puetunu nia miishanojuanaa cuaara quiiria maninia Judiocuaca niquiara, taucuaca niquiarajuhuj, parta Pueyaso pueya niquiaranio. Jiyanohua taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyanitiushano sacuraatia casaa. ³³ Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuaara tojitiaara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaaja cua miiniuria. Janiyari socua niishiriojoquiaa tamasaacuani, maninia cua miiniuria nojori niquiara.

11

¹ Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuaani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

Maajipohuatucua taa quiriquiani Pueyaso pueya rerejosacari

² Cuarta Jesuucua tiuuniaanaa, janiyari nia shuquiritiaani, pueyaracaanu nia niishishacari janiya, naajuhuj, maninia nia tojtiasacari puetunu cua niishitiojosanojuanaa Pueyasojiniji.

³ Janiyari paniya cutarani socua nio nia niishiniuria: Cristocuajaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuaani. ⁴⁻⁵ Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhuj, jiyacaritij, canuu cuaara jocuaara na nacaque na pocuasacari. Saniniuujia, maajipohua pocuanura, nojori cuaara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuj, na naca mishiquiosano. Cararaatiajaariuhuj, maaji pocuasacari Pueyasota, Pueyasoranio, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuanaacuaraarini? ¿Maajiti juhua cayara quiniu paniya? Maja naasucua. ⁶ Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonuranio,

cuno tojiyashijia cuaara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiririnij. Cararaatia quiyajaariuhuaaj, na secojosacari Pueyaso, na caminiujiushacari Pueyaso sequenu panishano pueya niquiarajuhuaaj, mishiquiosoo na naca quishacari. ⁷ Maajiiri neyaca shuquiritiya na tojijia na quishacari. Naacujitij, neyacaari narta pueya shuquiritiasano quiyajuhuaaj. Naaratej, maaji cuaara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniuriajuhuaaj. Cayari Pueyaso shuquiritiya Pueyaso tojijia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaaj.

⁸ Pueyaso jaara coteenujuanaa caya shipiniquiaari, majaari maajijiniji na shipininiu quiquiaari caya. Maaji cutaraari caya riuquiocujiniji shipinishaaquiaari. ⁹ Naacujitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuaara caya tojiiria cutara. ¹⁰ Naacujitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuaara mishiquioora na naca. Naacujitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhuaaj. ¹¹ Naajaa, puetunu pajaniyajanaari mariyata

Pueyaso muerasuni, Jesucristoocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supuenu cayaju. Naajuhuj, cayari maja na naata supuenu tamajaaja maajijiu. ¹² Seetanujuanaari, maajiiri coteenu shipinishaaquiaari caya cuaqueyajiniji. Na nuhuaji, puetunu canuujuanaari saniniuujia supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutoojonura.

¹³ ¿Taa nia sequeyani pueyanaa? ¿Maninateeri, maaji jaara Pueyaso secojore na naca mishiquiosoo pueya niquiara? Maja maninia. ¹⁴ Naajuhuj, quera puetunu pueyajanaari sequeja, cararaatia niquishanoori caya jaara tucamuejaru quiya juhua maaji. ¹⁵ ¿Maajiirijiatatj? Jaara tucamuejaru quiri, cunoori maninia niquishano cutara. Pueyasoori naa maninia shipiniquiaari maaji, tucamuejaru na quiniuria, na naca mishiquioriquiano na muecacata. ¹⁶ Tamonu jaara nacoonu panijajaa socua pa muesujiniji, niocua na sequere: “Pablocuajaari tari pa niishitiojoree puetunu na niishishanojuanaa. Naajuhuj, puetunu Pueyaso pueya maapuejanaari tamaquiicua naa miiquiaa taa Pablo pohuataree pajaniyacujani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

*Corinto pueyari sesa miiquiaari na miaquenuu-
juajinia, pa Jiyaniijia cusonu nojori niishishacari*

¹⁷ Cuarta Jesuucua tiuuniaanaa, nio, janiya niaacuara na naajiyani, nioori maja cua shuquiritianura nijaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree.

¹⁸ Janiyari naa pohuatasaarucuaa nijaniyajini-jini: “Corinto pueyari sesa na niishiriojonuta nojori jiuujiajinia raquirijitiaquiaa nojori rerejosacari”. ¿Seetanutejanaa nio pohuatasano nijaniyajiniji? Naa naasucuj. ¿Casaate cua toyani?

¹⁹⁻²⁰ Seetanu naasucujanaa niaari nioojiajinia naa niaaquejoquiaaquij. Paacuajaari tari niishiquiaarini noojiaqueya pueyari Pueyaso pueya maapueecuaji rupatenutaniya. Naa niishishanote canapuate maja Pueyaso muerasuni. Cante seetanujuanaa Pueyasoocua tiuujiani, majaari na rupatenu quiniutianiya narta Pueyaso muerasuucuj.

Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niaaquejono nia quiniuria. Niaa jaara naa niaaquejoriquiatej, majaari pa Jiyaniijia cusonu nia niishiniu quiquiaa seetanujuanaa.

²¹ Nijaniyanaari tama nia patasanojuaaja coteetaquiaa miaquenu. Niaanaari nia miaquesano serotaaquiquiaa. Naacuajitij, casamiijiuniucuaanaari miaajecoquiaacujua.

¡Saniniuuja casamiriacanaari juhuajaniya mashaasequenuuquiaacujua! ²² ¡Jiyanhua cararaatiaari naa nia miishanotej! Niaa jaara naa jamuejaca quiriquiatej, ¿majate nia naata tama nia tiajiniajaaja nia miaquenuunu, ratununio? ¿Niaateeri niarta Pueyaso muerasu sooquiaa? Naa nia miishacari casamiiuniucuatej, niaacuajaari nojori cararoquiaa, casamiiuniucua nojori quiniucua. ¿Taa nia sequeyani pueyanaa? ¿Janiyate nia maniniuhuaqueetaani? ¡Maja! Jiyanhua tacayanijia. Majaari cunora cua shuquiritianu niajaniya.

Pa Jiyaniijia rootasano na cusonu pa niishiniuria

²³ Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno niucujaja, Judasri pa Jiyaniijia quiateriquiano quiriquiaa taucua mosocoriquiano. Cua tojitiarohuacuara pueyanaa. ²⁴ Judas quiateyaquishacarijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quena”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵ Naajuhuj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera

nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijiaari naa sequequiaari. ²⁶ Naa nia miaquesacaritij, nia ratusacarijiuhuj, pueyari niishiniutaniya niaari Pueyaso jiyanooshano pueya, pa Jiyaniijia Jesu cusonuucua pa niti. Naa nia mi-aqueriquia pueyaracaanu na sequesano pan, pa Jiyaniijia cuara tiuquiriohuajaatijia.

Nia niishiri taate pa naata miaquenu pa Jiyaniijia cusonu pa niishiniuriani

²⁷ Naaratej, niaa jaara sesa miiri, Pueyaso nia secojore ritia na jiyanooniuhuara niajaniya, nia miaquenuhuara pa Jiyaniijia cusonu nia niishinuria. Niaa jaara pa Jiyaniijia pan miaquere jiyanooshoo nia quishacarijia, niaa jaara na cusonu mashaca rature jiyanooshoo nia quishacarijiuhuj, jniaari na cusonu rerequeteya! Niaari juhua sequeyaruhua, pa Jiyaniijia najuhuana cusoquiaari. Naa nia miishacaritij, niaa cutaraari saniitiosaanutaniya.

²⁸ Naaratej, tama nioojiajiniajaaja nia niishiriojore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoyaquishacarijia niajaniya. Naa nia miiniu nuhujitij, niocua shuquiriaatia juhuajaniya miaquerohua pa Jiyaniijia pan. Niocua juhuajaniya raturuhua pa Jiyaniijia raatonuquejiniji cutara. ²⁹ Cante juhuajaniya miaquereeni, cante juhuajaniya raturee

najuhuanani, jiyanooshoo na quishacarijia, cuno pueyanoori Pueyaso saniitiotenutaniya tama na cuaqueyajaaja. ³⁰ Naacuajitij, jiyanooshoo nia quishacarijia nia miaquesacari, queraatia niajanijajinijinioori cunora cusosuhua quiya. Noojiaqueya niajanijajinijinio cutaraari tari cusuonucanujuhuj, Pueyaso saniitiosacari nojori. ³¹ Nocuaji tama nia cuaqueyajaaja nia jecare suraatia, pa Jiyaniijia mariqui saniniuujia nia saniitioreeri. ³² Pa Jiyaniijia jaara pa saniniuujuri, canapuate sesa quiyani, Pueyasoori na saniitioquiaa na muerasu nojori quiniuucua, maninia nojori quiniuhuara juhua maninia na muerasu. Naacuajitij, juhuacarijia na saniitiosacari na muerasu, majaari pa saniitiosaanu quiniutianiya na ruuretjacata jiya puequesacari, Pueyaso jaqueroosacari na tojiyashijaca.

³³ Naaratej cuarta Jesuucua tiuuniaanaa, niaa jaara pa Jiyaniijia pan sanu paniriquia na cusuonuu niishiniuria, nia sashiri niarta Pueyaso muerasu, jatiqui nia miaquenura maninia. ³⁴ Miaajeyano maaraja, cuara miaqueera coteenu tama na tiajiniajaaja, Pueyaso mariqui nia saniitioreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

12

*Pueyaso Sohuanu cumaquishacari puetunu
Pueyaso muerasjuanaa*

¹ Cuarta Pueyaso muerasunaa, niaacuajaari tari niishiya Pueyasoori na Sohuanu niqutioquiaa puetunu pajaniyajanaa, na cumaaca pa jiitiana. Quiarijiani, socua nia niishitiojonu paniya cunojinijinjia. ² Niaacuajaari niishiya taa nia quiquiaari tarini, Pueyaso niishiyashijiaca nia quishacarijia. Niaari puetunu sapojosaaquiar-ijiana, pueya shipinishanoocua nia tiuuniuucua najuhuanaj. Sesaacaari naa nia tojitiquiaari najuhuaana pueya shipinishano, nia jiyaniushano pueyasohuani. ³ Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujuanaa Pueyaso Sohuanu cumaacata pahuataa Pueyasojinijini? Naa nia saniniuujuritij: Pueyaso Sohuanu pahuatesacari pueyano, nojuajaari maja na naata Jesucristo sesacanu. Naajuhuj, saaja Pueyaso Sohuanu cumaquishacari pueyano na naata sequenu: “Jesucuaajaari Jiyaniijijajanaa”. Naacuajitij, maja nia tojiniu na rupaa, cante Jesucristo sesacajani.

⁴ Pueyaso Sohuanuuri niquriyatujua. Naajaa, Pueyaso Sohuanuuri puetunu Pueyaso muerasujuanaa cumaquiquiaa tamaatia miishano pa miiniuria na cumaacata. ⁵ Queraatia tamaatia poonijosanoori Pueyasora quiya. Naajaa, puetunu pajaniyajanaari niquriyatujua Jiyaniijiaara poonijioquiaani. ⁶ Puetunu pajaniyajanaari tamaatia miiquiaa pa poonijosanoni. Saniniuujia, Pueyasojunaari na panishano miiquiaa puetunu pueya jiuujiajiniajanaa. ⁷ Pueyasoori puetunu na muerasujuanaa cumaquiquiaa na Sohuanuta, maninia pa miitioonura, Pueyaso muerasu

maapue cumaquishaanura puetunujuanaa.
⁸ Pueyasoori pa cumaquiquiaa tamaatia miishano pa miiniuria. Naacuajitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹ Pueyaso Sohuanuuri tamonu cumaquiquiaa Pueyasoocua na tiuniuria jiyanoohua, na shiniujiuniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhua cusosuhua na naatanijionura Pueyaso cumaacata. ¹⁰ Pueyaso Sohuanuuri tamonu pueyano jiyajeneta miishano miitijuhua Pueyaso cumaacata. Tamonuuri niishitishaaquiaa Pueyaso sequenu panishano na pohuatanura pueya niquiara. Pueyaso Sohuanuuri tamonu niishitiquiaa teyano sohuanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitiojoquiaa tamaatia rupaajinia sequesano na pacunura pueya rupaajiniajuhua, pueya tojiniuria maninia tama nojori rupaajiniajaaja. ¹¹ Naacuajitij, Pueyaso Sohuanuunaari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na paniyacuajani, cana na panijajaaniuhua.

*Puetunu Pueyaso pueyajanaari juhua niquiriy-
 atu cuaqueya quiya*

¹² Tamaatia poonijiosano puetunu pajaniyajanaa jiitiasacari, paari juhua niquiriyatu cuaqueya quiyani. Mijiria pa cuaqueyari jiyano hua maninia shipinishano jiyano hua Pueyaso niishitiajata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhaaj. Naacuajitij, Cristota rupuetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijiara pa poonijionura jatiqui. ¹³ Pueyasoori pa rupuetotequiaa na Sohuanuta, puetunu jatiqui pa quiniurijanaa. Pueyasoori puetunu na muerasujanaa samiitiani quiaari na Sohuanuta. Pueyaso Sohuanu pa jiitiasacari, puetunu pajaniyajanaari rupuetootesano quiya niquiriyatu Sohuanutani. Naacuajitij, paari juhua niquiriyatu cuaqueya quiyani: Judiocuaca, taucucacano, poonitijosano pueyajuhaaj, camarnuuju pueyano.

¹⁴ Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. ¹⁵ ¿Taa nia sequeyani pueyanaa? Pa niohuaca jaara seque: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhaaj, majaari

pa soonu tamaatia poonijiosano pa jiitiasacari Pueyasora. ¹⁶ Naajuhuj, pa numaa jaara sequere: “Janiyari maja namijiani. Naaratej, janiyari maja pueyano cuaqueyajiniijini”. ¿Taa nia sequeyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyatee? Maja. ¹⁷ Paa jaara saaja puereetuuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

¹⁸ Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetootesaquiaari tee Pueyaso paniquiaari nianucujani. Naajuhuj, Pueyasoori puetunu na muerasujuanaa cumaquiquiaa mariyata, tamaatia poonijiosano pa jiitianura taa na paniyacuajani. ¹⁹ Pa cuaqueya jaara quiriquia saa namijiaja puetunujuanaa, ¿pa cuaqueyatuma tee quiriquia socuani? ²⁰ Puetunu pa cuaqueya casaajanaari namitia saaja niquiriyatu cuaqueya quiya.

²¹ ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhua quijiaca. Maja nia naata niquiniu”, ¿majate pa juaashiquia pa panishanojuhuj? Taaquiriirinij. Naajuhuj, pa naca jaara pa niohuaca sequere: “Niohuacanaa, niaari najuhua quijiaca. Maja cua paniniu niya nijaniya”, ¿majate pa niohuaca pa panishanojuhuj pa rucuanejotajara? Taaquiriirinij. Pueyanaa,

naa pa quiri jatiqijihua puetunu parta Pueyaso muerasutajanaa, taa puetunu pa cuaqueyajinia pa jitiasano casaajanaa quiya jatiquicuaani. Naaratej, puetunu parta Pueyaso muerasujuanaari pa panishano quiya, pa cumaquitioonura maninia. ²² Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. ²³ Naajuhuj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhuasu pa quishacari. ²⁴ Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. ²⁵ Naacujitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniuriajanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuj. ²⁶ Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujanaa shuquiriaatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuj, parta Pueyaso muerasu jaara maninia miishaare, nojoritia pa timirijuhuj.

27 Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura.

28 Cristo cuaqueya pa quishacari, Pueyasoori coteenujanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitiojanaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasaari jiyatesaaquiaari cusosuhua naatanijionaa nojori quiniurijuhuj, Pueyaso Sohuanu cumaquishacari nojori. Tamasaari jiyatesaaquiaarijuhuj Pueyaso muerasu naacunaara nojori quiniuria. Tamasaari jiyatesaaquiaarijuhuj Pueyaso muerasu jiiitanaa nojori quiniuria. Tamasaari pohuatesaaquiaari tamaatia rupaacajuhuj. Naacuajitij, queraatia tamaatia poonijosanoori quiya.

29 ¿Puetunu Pueyaso muerasujanaateeri jiyaramiquishaaquiaari Jesucristojiniji nojori pohuatanura tamasaca niquiara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitiojanaa? Maja. ¿Puetunu Pueyaso muerasujanaateeri jiyajeneta miishano miijiaca? Maja.

30 ¿Puetunu Pueyaso muerasujanaateeri cusosuhua naatanijionaa?

Maja. ¿Puetunu Pueyaso muerasujuanaateeri tamaatia rupaaca pocuajaca? Maja. Tamaatia rupaajinia pahuatasano jaara quiriquia, ¿puetunu Pueyaso muerasujuanaateeri na naata na pacunu tama nojori rupaajiniaaja? Maja.
³¹ Naaratej, niajaniya cuaara jiaatiaara socua maninia poonijosano nia jitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiuuniaanaa, quiarijiani nia niishitiojoreera casaate socua panishanoni, Pueyaso shuquiritianura pajaniya.

13

Panijiaca pa quirij

¹ Pueyaso Sohuanu jaara cua pahuatere queraatia cua niishishoo rupaaca, Pueyaso seya rupaajuhuj, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani.

² Naajuhuj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniaquishacari pueya, janiya maara najuhuaana quijia quirini. Naajuhuj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuaana quijia quiri Pueyasorani. Naajuhuj, janiya jaara Pueyaso cumaacaraca quirini, tuhuananuhua cua jatanura tamocora Pueyasocua cua tiuuniucua jiyano huani,

naajaa. Cua paniyaquishacari pueya, janiya maara najuhuana quijia quiriquia Pueyasorani. ³ Naajuhuj, janiya jaara puetunu cua casamijanaa nareja niqutiore casamijiuniucua cua paniyaquiniutiani, cua Jiyaniijia maara cua shuquiritiaaquiri. Naajuhuj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuj, janiya jaara mosaare Pueyaso rupaa cua pohuatanuucua, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

⁴ Cante pueya panijiani, nojuajaari panaatia sashijia. Cante pueya panijiani, nojuajaari maninia miiijia puetunu pueyarajanaa. Cante pueya panijiani, nojuajaari tamonu pueya jiiiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu. ⁵ Cante pueya panijiani, majaari pueya na cararajonu. Cante pueya panijiani, majaari saaja nera niishiriojojua tamajaaja. Cante pueya panijiani, majaari ritia juaajia. Majaari na niishiniu naminiujiuhuj, tamonu jaara sesa na miiri. ⁶ Cante pueya panijiani, nojuajaari pueyacua taraajeja, nojori miishacari sesa. Saniniuujia, nojuajaari shuquiriaatia quiya pueya miishacari Pueyaso panishano. ⁷ Cante pueya panijiani, juhujaniya pueyaracaanu rejeretaari, tamasaca miishacari sesa nojuaja.

Majaari na taacanuunu Pueyaso sequesanojiniji, tamonu sequesanojininio. Naajuhuj, majaari na tarinitianu maninia miiniu pueyaracaanu. Pueya panijaari naa puetunu rejeretajajanaa, taraatia na miishacari.

⁸ Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijia pa quirij. Mijiria pa quishacari, Pueyaso Sohuanuuri pa cumaquiya Pueyaso sequenu panishano pa caminiujiuniuria, pa niishishoo rupaaca pa pocuanurajuhuj, Pueyaso niishitishano pajaniya pa pohuatanuranio. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. ⁹ Mijiria pa quishacari, paari saaja shiitianiyojua Pueyaso niishishano jiiitiaani. Pa niishishano Pueyasojiniji pa pohuatasani, cunoori saaja shiitianiyojua Pueyaso niishishanojiniji. ¹⁰ Naacuajitij, mijiria pa niishishanoori najuhuana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyajanaani.

¹¹ Janiya jaara naatujua quiquiaarini, juhua naatujua pocuaquiaarinijia. Juhua naatujua niishiriojoquiaarinijia. Saaja naatujua niishitija jiiitiquiaarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiaarini. Naajuhuj mijiria pa quishacari, paari juhua naatujoori quiyajaa Pueyaso niquiarani. Pa Jiyaniiija tiuquishacar-

ihua, paa cutaraari cumueeca Pueyaso pueya quiniutianiyani. ¹² Mijiria pa quishacarijia, paari shiitianiyojua niishiyani. Paari juhua ninitia niquiya jariyani, juhua sesarunee niquitiujinia. Pueyaso shuriucua pa quishacari, paari maatia niishiniutianiyani. Quiarijiani, saa shiitianiyojuaari pa niishishano. Na nuhuaji, Pueyasota pa quishacari, paari puetunu maniniajanaa niishiniutianiyani, naatej, taa Pueyaso niishiya puetunu pajaniyajanaacuaani. ¹³ Quiarijiani, paari Pueyaso rupaacua tiuuniu niishiyani. Naajuhuj, paari juhuajaniya sashiniu niishiyani, maatia pa niishishacari nojuajaari maninia miniutianiya pajaniya. Nioori maniniacuaaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajinijiniojuanaa.

14

Niishishoo rupaaca pocuanujiniji niishitiosano

¹ Naarate cua panishano Pueyaso muerasunaa, nia jiaatiare socua jiyanohua pueya panijiaca nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jiitianura maninia nia miiniuria. Panishano cutaraari Pueyaso Sohuanu niishitiaja nia jiitianura, Pueyaso sequenu panishano nia caminiujiuniuria Pueyaso pueyara. ² Cante niishishoo rupaa pocuaa pueya niquiara Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na

najuhuana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajiniajanaa Pueyaso niishitiojosano janiyani. Maniniajaariuhuj janiya jaara nia niishitiojore Pueyaso rupaa nia rupaajiniani. ⁷ Nia niishiriojore. Jiuujiaaju casamiiri rupaaracajuhuj. Naaratej, paari shuquiriaatia tojitiaa naajua jonesesarini, jaaquequejotaja taquinosacarijuhuj. Saniniuujia, pueyano jaara naajua jonenejonu saniniujiya na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishiniu casaa na jonenenu paniya juucuan. ⁸ Naajuhuj, trompeta jaara sesa jonesesaare, ¿soldadohuate na naata niishiniu casaa na miiniutianiyani? Maja. ⁹ Mariyata naajaariuhuj, niaa jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocuateya najuhuana nojori niquiara. ¹⁰ Niaacuajaari niishiya queraatia rupaacaari mijiria quiya. Puetunu maniniajanaa cutaraari na niishiniaara. ¹¹ Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuanaari tahue quiya quiriajuhuj. ¹² Cuarta Jesuucua tiuuniaanaa, niaacuajaari Pueyaso Sohuanuucua jiaatiaquiaa, na cumaaca nia jitianura. Maniniacuaja. Naajaa, niajaniya cuara jiaatiaara Pueyaso Sohuanu cumaquiniuria niajaniya, puetunu tamaatia poonijosanojuanaa nia miiniuriajuhuj, maja saaja tamaatia

rupaacajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari niajaniya.

¹³ Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuara secojora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajiniajuhuaj. ¹⁴ Pa secojosacari Pueyaso

pa niishishoo rupaajinia, Pueyaso Sohuanuuri pa sohuanu secjoteya Pueyaso. Majaari pa niishitiaja niishiniu cutara casaa pa sequeyani.

¹⁵ Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuara secojora Pueyaso pa niishishoo rupaajinia. Pueyaso pa secjorejuhua tama pa rupaajiniajaaja. Naajuhuj, pa sohuanu cuara jaaquequejora Pueyaso niquiara pa niishishoo rupaajinia. Pa jaaquequejorejuhua tama pa rupaajiniajaaja. ¹⁶ Pueyaso Sohuanu jaara nia

sohuanu secjotere niishishoo rupaajinia, nia tojitianaari maja na naata sequenu: “Jaa, cuara naa quiiriatej”. Majaari nojori niishiniu tamaatia rupaajinia nia secojosano. ¹⁷ Niaa naasucuaari

jiyanohua maninia secojiya Pueyaso. Naajaa, saaja najuhuaana quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca.

¹⁸ Pueyanaa, shuquiriaatia quiyanijia Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia

rupaacajinia pocuaja socua niajanijajiniji cutarani. ¹⁹ Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhua quiriQUIAJ. RupaQUIJIA pOHUATASANO tama pueya rupaajiniajaajani, cunoori jiyanoHUA socua maninia tucuayocua pOHUATASANOJINIJ niishishoo rupaajinia. Saaja pueya niishishano rupaajinia cutara cua naata nojori cumaguiniu.

²⁰ Cuarta Pueyaso muerasunaa, niaari najuhua shuQUIRIYA niishishoo rupaajinia nia pocuasacari pueya niQUIARA, naatej, taa naatujoori shuQUIRITIAQUIAA QUIARINIO tacuarishijiotajacuaani. NIAA jaara juhua naatujoori quiniu panijajaa, sesa niishiriojiyashijiaca nia quiri, taa naatujoori QUIYACUAANI. Saniniuujia, majaari seetanujuanaa naatujoori niajanija. Naaratej, cumantumaca nia quishacari, nia niishiriojore maninia nia cumaquitioonura nia rerejosacari. ²¹ Tariucuacaanu, tama Pueyaso sequesanojaarijia naajiotasaaQUIAARI. Naa sequeyari:

“Janijari taucuaca jiyaramiquiniutianiya cua saQUIRIOJOSANO Israel pueyacuani, cua sequenu panishano nojori pOHUATANURA cua pueya. Cua pueya niishiyaquishoo rupaacajinia pOHUATANUTANIJARI. Naajaa, niishianijia, tahua pOHUATASACARI cua rupaa, cua pueyari saa cua ruuretanutanijajaa, taa nojori ruuretaQUIAA cua rupaacuaani jaara tama nojori rupaajiniajaaja pOHUATASARIQUIAA”.

²² Naa Pueyaso sequesacaritij, paari niishiyani,

Pueyasoori tamaatia rupaacata na tojiyashijiaca tojitiniu saniniujuiquiaa na rupaa juucua. Paari saniniuujia tari na rupaa tojitiajaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojitiniuria pajaniya nojuaja. Pueyaso sequenu panishano caminiujiushano cutaraari pajaniyara. Cunocujaari tama pa rupaajiniaajaaja. Cunoori maja Pueyasooocua tiuyashijiacara. ²³ Naaratej, Pueyaso pueya maapue rerejosacari, saaja secaja niajanijajiniinio cuaara pocuara niishishoo rupaacajinia. Naa pocuanu nia tarinitiare quenaaja, tamasaca Jesuucua tiuyashijiaca quishacari nia rerejojuajinia, nojori mariqui jyaniriiri: “¡Nio pueyaqui puetunu paatecoorijiuhanajaj!” ²⁴ Saniniuujia, puetunu niajanijajanaa jaara Pueyaso sequenu panishano caminiujiya tama nia rupaajiniaajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniutianiya sesa miiija na quiniucua. Tama nojuajaari nia niishiniutianiya: “¡Janiyaqui sesa miiija Pueyaso niquiarani!” ²⁵ Nia pohuatasano Pueyasojinijiiri puetunu sesa na miishanojuanaa na niishitiniutianiya noojiajania. Nocuaji, nojuajaari Pueyaso tojijiaara quiniutianiya. Sequenutaniyari: “¡Pueyasoqui seetanujuanaa nia tajinia niya quiya!”

Puetunu nia miirijianaa maninia. Majaari nia riutiocojonu tamonu pocuasacari

²⁶ Naaratej, cua tojitiare taa nia miiniutianiyani cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuaara quiiria nia cumaquitioonura, socua maninia Pueyaso tojtianaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiujiuniutianiya. Tamonu naasucuaari niishishoo rupaaajinia pocuanutaniya. Na nuhuaji, tamonu cuaara na pacuura nia rupaaajinia, maninia nia tojiniuria. Naa nia miiri maninia. Niquiriyatujua cuaara pocuara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohuatasacari. ²⁷ Niaa jaara niishishoo rupaaajinia pocuanu paniri, cuaara pocuara saa querajaa pueyaja, maja socua. Cuaara pocuara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaaajinia, niishishoo rupaaajinia nia sequesano, pueya tojiniuria maninia. ²⁸ Niishishoo rupaa pacuna quiyaquishacari, cuaara pocuaaquiiria cante tamaatia rupaaajinia pocuanu paniriquiaa nia niquiarani. Na naata sanaa pocuanu noojiajinia tamajaaja, saa Pueyaso niquiaraja.

²⁹ Naajuhuj, niaa jaara Pueyaso Sohuanu niishitiojosano nioojiajinia pohuatanu paniri, cuaara pocuara saa querajaa pueyaja, maja

socua. Na nuhuaji, Pueyaso Sohuanu cumaaca jiiitianaa cuaara saniniuuiuuria nia pohuatasano, nia niishiniuria, cunote seetanujuanaa Pueyaso Sohuanu niishitiojosano, maja soj. ³⁰ Nia pohuatasacari Pueyaso rupaa, tamonu jaara pohuatanu paniya shusha Pueyaso Sohuanu niishitiojosano noojiajinia, cante pohuataajaani cuaara sanaajeera, na tarajana pocuanura. ³¹ Naacuajitij, puetunu Pueyaso niishitiojosano jiiitianaajanaari na naata na pohuatanu. Naaratej, niquiriyatujua cuaara pohuataara, na nuhuaji tamonu, na nuhuaji socua tamonu. Naacuajitij, puetunu niajanijajanaa na naata pohuatanu nia niishishano Pueyasojiniji. Naacuajitij, puetunu Pueyaso muerasujuanaari maninia niishitiojosano quiniutianiya, maninia cumaquishanojuhuj, maninia nia miiniuria. ³² Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaniya, tari tamonu pocuasacaricuaa. Nia naata cutaraari sashiniu nia pocuanura. ³³ Pa Pueyaso cutaraari maninia miiijajanaa. Maja cushitiojojua. Naarate pueyanaa, maja tamasaca pocuasacari pa riutiocojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuaara naa miiria na rerejosacari. ³⁴ Maajipohua cuaara sanaa tojitiaara Pueyaso rupaa pohuatasacari. Maajipohua cuaara niishitiojiyaquiiria pueya niquiara. Maajipohua cuaara tojijjara quiiria, taa pa niishitiojosaaquiaari Moisés

Rootasanojinijicuaajani. ³⁵ Maajipohua jaara niishiniu paniya socua pohuatana niishitiosanojiniji, nojori cuaara nequesotohuara neyaca tama na tiajiniajaaja, na que maaraja. Cararaatia cutaraari maaji jaara nequesoreetare caya pohuatasacari, Pueyaso muerasu rerejojuajinia. ³⁶ Nia tojiri nio cua rootasano pueyanaa. Niaacuajaari niishiya, Pueyaso rupaari supueyaquiquiaari niajanijajiniji. Naajuhuj, majaari Pueyaso rupaa pohuatanaa jiyaramiquiniu quishaaquiaari saa niaacuaja. Tamonu jiyacajinia, queraatia Pueyaso pueya maapueeri cua niishitiojosano tojtiaquiaa maninia cutara. ³⁷ Niajanijajinijinio, noojiaqueya pueyari Pueyaso Sohuanu cumaaca jiiitiaa, nia niishiniuria cana cumaacata tamonu pueyano niishitiojiyani. Naacuajitij, ¿taa nia sequeyani? ¿Majate Pueyaso Sohuanu niishitiojosano cua sequesano niajanija? ³⁸ Cante nio niishiniu paniyaquiyani, cuno jiyoteeri maja Pueyaso Sohuanu cumaacaraca quijia. Cuno pueyano cuaara tojiyaquishaaria saniniuujia.

³⁹ Naacuajitij cuarta Pueyaso muerasunaa, nia jiaatiare Pueyaso Sohuanu cumaaca nia jiiitianura, pueya niquiara nia pohuatanura Pueyaso Sohuanu niishitishano niajanija. Naajuhuj, majaari nia tenujunu noo pojori, canapuate niishishoo rupaacajinia pocuanu paniyani, Pueyaso Sohuanu cumaquishacari nojori. ⁴⁰ Nareja maninia nia miiriquia puetunujuanaa. Naacuajitij, niquiriyatu cuaara pocuara coteenu, na nuhuaji tamonu, na nuhuaji socua tamonu.

15

Cristo samiitiasacariuhua

¹ Cuarta Jesucua tiuuniaanaa, Jesucristo rupaa nia niishiriohua, tarijia cua pohuatasano niajaniya, nia jiyanooshaanurani. Niaari nocua tiuquiaari maninia. Niaari quiarijia maninia na tojtiaajaa. ² Naacuajitij, Jesucristoori niaacuaji tacuquiaa quiarijia, maninia nia tojtiasacari na rupaa, taa cua pohuataquiaari niajanuacuajani. Niaacuajaari Pueyaso pueyara jatanishano quiya niaa jaara maja najuhuaana na rupaa tojiaquiaari. ³ Janiyari niaara caminiujuquiaari Jesucristo rupaani, taa cua tojiquiaaricuaani. Nio cutara rupaa nia coteaquiaari pohuatanunjia: Cristoori pocuara cusoquiaari niyacutesanojinia, sesa pa miiniuucua. Tariucuacaanu Pueyaso sequenu panishano caminiujiuniaari naa naajiotaquiaari, taa Cristo miishaanutaniya naquiyaani. Seetanujuanaa naa miishaaquiaariiri. ⁴ Jesucristo cusonu nuhuaji, raaco niasaaquiaariiri. Jiuujianaraca juuca jaara na shoconujuquiaari macu na quishacari, na raaco samiitiaquiaariuhuari. Naa tohuateequiaariiri puetunu tariucuacaanu Pueyaso Rupajanaa, taa nojuajiniji naajiotasaaquiaaricujani. ⁵ Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacia muetaquiaariijaariuhuj. ⁶ Na nuhuaji, muetaquiaarijuhuaj na tojtianaa rerejosaquiiri. Socua quiniento pueyari na niqutiaquiaari jiyacari. Queraatia jiyacari na

niquiniaajinijinio pueyari saminio quiyajaa. Noojiaqueyari tari shaajecocanu. ⁷ Na nuhuaji, pa Jiyaniijaari Santiagoocua muetaquiaarijuhuaj. Na nuhuaji, muetanu pacutequiaariuhua na doce jiyaramiquishocoriquiano pueyacuara.

⁸ Puetunu cuno pojori nuhuaji, Jesucristoori socua cucua muetaquiaarijuhuaj, nocua tiuujia cua quiyaquishacaribia. Naa na paraca cua quishacaribatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniuriajuhuaj. ⁹ ¿Casaaraquitibia na saquiriojoquiaari janiyatejaj, na jiyaramiquishano cua quiniuriajuhuaj? Janiyari puera sesa miijia quiquiaarini cua niishiyaquishacari Jesucristo. Cucua na muetaaquishacaribia, janiyari Pueyaso saquiriojosano pueya miitiaquiaarini. Cuarta Jesucristo jiyaramiquishano pueyari maja naa sesa miijiaca na qutiuniu quiquiaari. ¹⁰ ¡Pueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniuriajuhuaj, taa cua quiya quiaribiacuajani. Naa quiyaniija Pueyaso jiyanooniucua janiya. Majaari najuhuana na jiyanooni quiquiaari janiya. Na jiyanooshacari janiya, janiyari socua jiyanoohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijosanoori maja tama cua miishanojuaja na quiniu. Pueyasocuaajari cua cumaquiquiaa na Sohuanuta, maninia cua miiniuria na panishano.

¹¹ Naacuajitij, naa sequeriquiaa niajaniyanijia: cante nia pohuataquiaari Jesucristo rupaani,

naajaa. Janiyari Jesucristo rupaa pahuataquiaa-
jaacuhua, mariyata taa cuarta Jesucristo
jiyaramiquishano pueya pahuataquiaacuaani.
Majaari rimiajata canaa pahuatasano. Niaari
cuno rupaacua tiuquuaari maninia.

*Pueyaso muerasu macunucua samiitiasacari-
uhua*

¹² Cuarta Jesuucua tiuuniaanaa, canaa jaara
pohuatariquiaa taa Cristo samiitiaquiaariuhua
macujinijini, ¿casaara noojiaqueya nijaniya-
jinijinio sequequiaani: “Macunucua maja na
samiitiaconu quiniutianihua”? ¹³ Macunucua
jaara samiitianiyaquishaanutaniya taa nia
sequequiaacuajani, Jesucristo jiyoteeri macu
quiyajaacuhua. ¿Cristoteeri macu quiyajaa?
¡Maja! ¹⁴ Cristo jaara macu quiriquiaja, canaa
maara najuhuana pahuataa na rupaani.
Naajuhua, niaa maara najuhuana Jesucristoocua
tiuya, na pueya nia quiniu paniniuria
juucua. ¹⁵ Canaacuajaari pahuatanuuquiaani
Pueyasoori Jesucristo samiitianiyaquiaariuhua.
Macunucua jaara samiitianiyaquishaanutaniya
taa nia jiyaniquiaacuajani, canaa jiyoteeri
sajonuujuaca Pueyaso jiyaramiquishano
pueyani. Naacuajitij, nia sequesano jaara
seetanujuanaa quiri, maja jiyoteeri Pueyaso
samiitianiniu quiquiaariuhua Jesu. Saniniuujia,
niaari jiyajeneya cutara! ¡Pueyasocujaari
seetanujuanaa Jesu samiitianiyaquiaariuhua!
¹⁶ Macunucua jaara samiitianiyaquishaanu-
taniya taa nia sequequiaacuajani, Cristo maara
samiitaaquiquiaariuhua. ¹⁷ Cristo jaara

samiitiaaquiquiaari, niaa jiyoteeri Cristoocua tiuya najuhuanaj, Pueyaso na jiyanootiniuria juucua nijaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhuj. ¿Naatejaaratej? ¹⁸ Cristo jaara macu quiriquiaja, tariucua shaajecono nocua tiuniaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhuara. ¹⁹ Pajaniyajuhuj, canapuate saminio quiyajaani, paa maara jiyanoohua taraatia quiyani, pueyaracaanu najuhuaana naquiya pa miishacari mijiria. Jaara naa quiritij, pa Jiyaniijia Jesucristo jaara macu quiriquiaja, paa maara najuhuaana poonijioriquia pa shuquiritiniuria nojuaja juucuan.

²⁰ ¡Namitia naa quiyaquiyari! ¡Cristoori seetanujuanaa samiitianishaaquiaariuhua! ¡Canaari na niquitiaquiarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuniaajanaari samiitianishaanutaniuhuaajaacuhuj. ²¹⁻²² Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniucua. Naacuajitij, puetunu nojuajiniji supuenaajanaari shaajecoquiaajuhuj. Adán nuhuaji, parta pueyano Jesucristoori saniniuujia Pueyaso tojijia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua

tiuuniaajanaari samiitianishaanutaniuhua, pueyaracaanu saminio pa quiniuhua pa Jiyaniijata. ²³ Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacarini. ²⁴⁻²⁶ Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianiuhua, na tucuatenuhuara puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijajanaa quiniutianiya, na Que cuara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiicajanaanio. Sesaacaari jataaanutaniyajuhuj, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyajaariuhuj. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiitiasano quiriohua, Jesucristoori na Que na niqutionutaniuhua, na Que jiitianuhua puetunujuanaa.

²⁷ Na Que Pueyasoori Jesu jiyatequiaari Jiyaniijia na quiniuria jyanohua na cumaacata. Naacuajitij, nojuajaari na naata puetunu casaajanaa na tojtianiniu. Nojuajaari Jiyaniijajanaa. Saa na Que Pueyasojuuari socua Jiyaniijajanaa,

maja tamonu. Pueyasajuanaari Neyanu jiyaroquiaari puetunu na shipinishanojuanaa na jeenucuanura na cumaacata. ²⁸ Na tucuatascari, pa Jiyaniijia Jesucristoori na Que sequenutaniya: “Cua Quenaa, tari tucuataree quia panishanonijia. Puetunu quia paraajanaa quejooree tarinijia. Majaari socua sesa na miiniu quiniutianiya. Saa quiajanijajaari pueyaracaanu Jiyaniijiajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojuanaa na jiitianura maninia.

²⁹ Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianihua, ¿casaara pueya tiuquinijosaaquiaa moojinia macu nitini, cuno macu jaara na shaajeyaquishacarijia Jesucristoocua tiurii? Paa jaara tiuquinijosaaquiaa Jesucristoocua pa tiuushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuj, paari mariyata samiitianishaanutaniuhuani. Niaari sequeya macunucuaari maja na samiitianishaanu quiniutianihua. ¿Naatejaaratej? Macunucua jaara samiitianijiyaquishaanutaniuhua taa nia jiyaniyacujani, ¿casaara pueya tiuquinijosaaquiaa shusha shaajeno macu niticuararini?

³⁰ Paa jaara samiitianiyaquishaanutaniyani taa nia sequequiaacuajani, canaquiiri najuhuana

tama canaa cuaqueyajaaja panitiaquiaani, pueyaracaanu canaa poonijosacari pa Jiyani-ijiara. ³¹ Seetanujuanaa nia sequeyanijia, janiyari jiyanohua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujuanaajaariuhuj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuani. ³² Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucuan, nojuaja jaara samiitianiyaquishaaquiariuhua. Paa jaara samiitianiyaquishaanutaniyani, pa miiriqui taa Pueyaso tojiyashijiaca sequequiaacuajani: “Pa shuquiriri saminio pa quishacarijia. Pa queranacunuure. Pa mashaasequenuurejuhuaj. Naajaa, pa shaajesacari, pocua puetunu shaajequeejanaani”. Naa sesa miiquioquiaari noo pojori, canapute jiyaniyani macunucuaari maja na samiitianishaanu quiniutianiya.

³³ Pueyanaa, tama nia cuaqueyajaaja nia co-juare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujuanaatej: “Maninia miiji-aari sesa miijiara jatanishaaree na cojiniuucua sesa miijiaca”. Naaratej, majaari nia cojiniu

sesoriquia pueya, niaa mariqui seserejaariuhuj.
³⁴ Niishiriojojuara nia quiri. Sesa nia miiniu
 nia cartere. Noojiaqueya niajaniyajinijinioori
 Pueyaso niishiyashijiaca quiyajaa. Naa nia se-
 quereenijia pueyanaa, quenaaja nia caririqini-
 uria.

*Taamueca pa quiniutianiuhuani pa
 samiitiasacariuhua*

³⁵ Tamonu niajaniyajinijinio naasucuaari
 niishiriojiya: “¿Taa macunucua samiitian-
 ijiosaanutaniuhuajaarani? ¿Taamuecate na
 cuaqueya quiniutianiyani?” ³⁶ Maninia nia
 niishiriojore pueyanaa. Maja niishiyashijia
 nia quiniu. ¿Majateeri nia jamosano naana
 jajau co moquenu, neyona moritianura?
 Naacuaaquinatejaj. Saa na co moquesacarijia
 na naata moritanu. ³⁷ Naajuhuj, niaa jaara
 saaco natate, tamaatia jajaujuhuaj, nia natasano
 jajauri maja juhua neyonarano niquishano.
 Nia natasanoori saaja shiitianiyojua jajau
 quiya. Na moritiasacari, jiyanojua tamaatia
 niquishiyari. ³⁸ Pueyasoori na maashitiya
 puetunu na jaamasucuatajanaa, taa na
 panyacuajani. Pueyasoori puetunu jajaujanaa
 moritianijia tamaatia niquishano na quiniuria.
 Naa quiniutianiyajaariuhua macunucua
 samiitiasacariuhua. Majaari pa cuaqueya
 quiniutianiya taa na quiya quiarijiacuajani. ¡Pa
 cuaqueyari jiyanojua maninia quiniutianiuhua!

³⁹ Majaari puetunu cuaqueyaraca casaajanaa
 mariyata na quiniu. Naacuajitij, pueyano
 cuaqueyari tamaatia quiya casaa cuaqueyajiniji.
 Shuhua cuaqueyari tamaatia quiyajuhuj.

Sapitiaaja cuaqueyari tamaatia quiyajuhuj, moojina na quiniuria. ⁴⁰ Jiyocuacaanu quijiacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniji. ⁴¹ Naajuhuj, pananuuri jiyanoehua shacantuuca quiija. Raca shacantuucaari tamaatia niquishano pananu shacantuucaginiji. Riya shacantuucaari socua tamaatia niquishano. Naajuhuj, puetunu riyajanaari tamaatia niquishano narta riyajiniji. Puetunu Pueyaso shipinishanojuanaari naa tamaatia quiya.

⁴² Naajuhuj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaari saniniuujia samiitianishaanutaniuhua, pueyaracaanu na quiniuria. ⁴³ Jamosano pa quete sequeeri samiitianishaanutaniuhua, jiyanoehua shanohua niquishano na quiniuria. Cumaacaaju jamosanoori samiitianishaanutaniuhua jiyanoehua cumaacaraca na quiniuria. ⁴⁴ Pa cuaqueya jamosanoori saaja jiyacua rucuanajaca quiquiaari. Paari samiitianishaanutaniuhua tamaatia cuaqueyata, jiyocuacaanu quijiaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucuanenonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiririnij.

⁴⁵ Pueyasoori coteenu pa supuetana shipiniquiaari marajiniji. Na nuhuaji, na

samiitianiquiaariiri. Moisés Naajioneejiniaari naa naajiotasaaquiaariti:

“Adánri saminiora quiquiaari Pueyaso nooshacari na jiquioco”.

Jesucristoori saniniuujia jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jiyanoehua socua cutara Adánjiniji! Adánri samiitianishaaquiaari saminio na quiniuria. Jesucristo cutaraari pa samiitianijiajanaa na Sohuanuta.

⁴⁶ Coteenujanaa pa supuetanani, majaari na shipinishaanu quiquiaari jiyocuacaanu quijiarano. Cunora, coteenu pa cuaqueyari saaja mijiria quijiara. Na nuhuaji, pa cuaqueyari jiyocuacaanu quijiara jatanishaanutaniya mariyata juhua Jesucristo cuaqueyara. ⁴⁷ Adánri saaja mijiria quiriquiano quiquiaari. Marajiniji shipinishaaquiaariiri. Jesucristoori saniniuujia jiyocuacaanujinio. ⁴⁸ Puetunu Adáncuajinio

supuenojuanaari saaja mijiria quijiaca. Naaratej, puetunu pajaniyajanaari saaja cusonuujucani, juhua pa supuetana Adánjuhuaj. Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuacaanu quijiaca pa quiniuria. ⁴⁹ Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiaritia socua maninia Adán cuaqueyajiniji. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacuajaari pa samiitianinia Jesucristo.

⁵⁰ Cuarta Pueyaso muerasunaa, maja pa naata

Pueyaso rupuenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupuenu. ⁵¹ Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusonuuriqianoni. Puetunu pa cuaqueyajanaa cutaraari jatanishaanutaniyani, maninia cuaqueya pa jiitianura, juhua Jesucristo cuaqueyajuhua. ⁵² Jiyocuacaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritiacuaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonura. Canapuate macu quiyani, quiarinio cuaqueyata ritia samiitianutaniuhuari. Pajaniyajuhua, canapuate saminio quiyajaani, pa cuaqueyari ritia jatanishaanutaniyajuhua, quiarinio cuaqueya pa jiitianurajuhua, shaajeyashijiaca pa quiniuria. ⁵³ Cusonuuja cuaqueya cuaara jatanishaaria, rishijia cuaqueya pa jiitianura saniniuujia. Nio moqueja pa cuaqueyani, jataniniu panishiyari, maninia cuaqueya pa jiitianura, pueyaracaanu pa quiniuria Pueyasota.

⁵⁴ Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuacaanu sequesanoori tari tohuateeree. Naa naajiotasaaquiaari tariucuacaanu Pueyaso Rupaajiniatej:

“¡Jeje! ¡Pa Jiyaniijiaari na muerasu mashiquirii macunucua quiquojiniji! ⁵⁵ Cusojuananaa,

¡quiaaqui tari shocotasaaree! ¡Quiaari shocotasaaree! Sesaacanaa, quia cusojuatajaari juhua mohuacara quiquii cumaacaaju. ¡Shaajeconoori samiitiacoree!”

⁵⁶ Pueyanaa, puetunu pajaniyajanaari cusunuuquiaa sesa miijiaca pa quiniucua mijiriani. Paari sesa quiquiaani pa tojiyaquishacari tariucuacaanu Moisés Rootasano Pueyasojiniji. Naaratej, puetunu pueyajanaari cusonu niishiya. ⁵⁷ Naajaa, pa Jiyaniijia Jesucristo miishanota pocuara, Pueyasoori pa mashiquiquiaa pa cusoyaquiniucuaaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuajaari canaa shocotaniniutianiya cusonu, quia Niyanu cusunucua canaacuara, pueyaracaanu canaa quiniuria quia shuriucua. ¡Jiyanohua paacarasho!” Paari naa maniniuhuaqueetaa pa Que Pueyasoni.

⁵⁸ Naaratej cua panishano pueyanaa, nia numaama nia racatare cua niishitiojosano niajaniya. Saa Pueyaso rupaaja nia tojitiare, maja tamaatia niishitiojosano. Pa Jiyaniijia nia poonijiore socua jiyanohua, na panishano nia miiniuria saaja. Pa Jiyaniijia nia poonijosanoori maja najuhuana na quiniu.

16

Casamijiuniucua Pueyaso pueyara cumaneeca reratesacari

¹ Quiarijiani, nia riucuaereera taa nia miiniutianiya, cumaneeca nia reratenura casamijiuniucua. Cuno cumaneecani, paari na jiyaronutaniya parta Pueyaso

muerasura Jerusalén tiacajiniani. Níaa cuuara maninia miiria, mariyata taa cua rootacanucuaaja Pueyaso pueya maapue Galacia jiyajiniani. ² Naa nia miiritij. Puetunu domingo juucajanaa, puetunu pueyajanaa cuuara racataara tama na niqutiosocoriquiano cumaneeca, teyano nia niqutionutaniya niarta Pueyaso muerasuracuajani. Naa nia racatare juhuataja nia niqutiosocoriquiano cumaneeca puetunu semaanajanaa, maja na reratesaanura shusha cua tiuquishacari niaacua. ³ Niocua maninia pueya saquiriojore, nia niqutiojosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiuuniaa pueyacuara Jerusalén tiacajinia, nojori cuuara shuquiriaatia maseera cumaneecata nia jiyarotasano pueya. ⁴ Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

Pablo naquerejosacari

⁵ Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiyani. ⁶⁻⁷ Janiyari maja ritia cua tajiniu paniniu niajaniya. Ni-aata camueenujunu paniya pueyaracaanunijia, pa Jiyaniijia jaara naa panijahuaj. Janiyari shuniya shocotenu paniya niaatani. Na nuhuaji, nia naata cua naacunu cua jitianura cua panishano, cua pasocoriquiano tee Pueyaso jiyaronu

paniya janiyacujani. ⁸⁻⁹ Janiyari niya Éfeso tia-cajinia camueenujiyajaarani, Pentecostés juuca cua sashishacari. Queraatia pueyari Jesucristo rupaa tojitianu paniya niya. Naajuhuj, queraatia pueyari Jesucristo rupaa ruuretaa saniniuujia. Naaratej, janiyari jiyanoehua socua Jesucristo rupaa pohuatanu paniyajaa Éfeso pueya niquliarani. Naajaa, janiyari niaacua quianutaniyani Pentecostés juucara queranacunuunu nuhuaji.

¹⁰ Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocujaari pa Jiyaniijiara poonijioquiaa mariyata taa cua poonijioquiaacuaani. ¹¹ Naaratej, maja Timoteo nia rerequetenu. Niocua na naacure saniniuujia, cuca na tiuquiniuhuara shuquiriaatia, maninia nia miiniuucua nera. Janiyari niya na sashiya parta Pueyaso muerasutani. ¹² Janiyari Apolota pocooriquiaani. Janiyacuajaari na nenecooriquiaa juucuaani, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

Pablo sequesano, naajionu na puecasacari

¹³ Cuarta Jesuucua tiuuniaanaa, niishiriojuaca nia quiri. Jesucristo rupaa nia niishiri maninia, seetanujuanaa na tojitianaara nia quiniuria. Juhua cumueeca mashaja nia quiri Pueyaso Sohuanu cumaacata, pa Jiyaniijia panishano nia miiniuria. ¹⁴ Puetunu nia miishanojuanaa cuara quiiria seetanujuanaa nia paniniutia.

15 Pueyanaa, niaari niishiya Estéfanasri necohuata coteenu Jesucristo tojtianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyaracaanu nojori paniniutia. 16 Naarate nia sequenu paniyanijia, niajaniya cuaara quiiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapuate naa maninia miiquiaa Pueyaso muerasucujani.

17 Jiyano hua shuquiririucuaanijia Estéfanas tiuquishacari niajanijini Fortumatota, Acaicotajuhua. Nojoriiri cua shuquiriritiucuaa nia niti, cua jiaatiasacari cua niquiniuria niajaniya juucua. 18 Nojoriiri coojia cajitiriucuaa puera cua niishiriojiyaquiniuucujani niaacua. Nojori naasucuaari nioojia cajitiquianujuhua, nojori pohuatasacari niajaniya janiyanijini. Niajaniya cuaara shuquiritiaara nojori, naa nojori miishacari maninatej.

19 Pueyaso muerasu maapue niya Asia jiyajini-aari cua sequerucuaa, cua saruhuatanura niajaniya. Aquila, Priscilano, nojoriiri jiyano hua nia saruhuataajuhua, narta Jiyaniijia muerasu nia quiniuucujuhua. Pueyaso pueya maanuuri nia saruhuataajuhua, nooj, teyanote Aquila tiajinia rerejoquiaacujani. 20 Puetunu parta Pueyaso muerasujanaari niya nia saruhuataajuhua. Nia sarhuatatoosacari, nia sarhuatatoore seetanujanaa Pueyaso paniniutia.

21 Quiarijiani, tama cua juaashiquiatajaaja saaja nioniyojua naajioreeraj, cua saruhuatanura

niajaniya. Naacujitij, niocua niishiri nio
naajioneeri seetanujuanaa janiyajiniiji.

²² Cante maja pa Jiyaniijia panijia
quiyani, Pueyaso cuara jataara cuno,
saniitiosocoriquiano.

¡Jiyaniijianaa, quia nimiohua!

²³ Pa Jiyaniijia Jesu cuara cumaquiiria nia-
janiya na Sohuanuta. ²⁴ Janiyari puetunu nia-
janiyajanaa panyani Jesucristo paniniutia. Tari-
ucuaja, cua panishano pueyanaa.

**Quiarinio pueyaso rupaa pa jiyaniijia
Jesucristojiniji pueyano rupaajinia
New Testament in Arabela (PE:arl:Arabela)**

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022

90034700-94c6-5f48-ae9c-2383843fed68